



**ATASSUT**  
Nunatsinni liberal-iusumik partii

## **Aallarniut**

Tunngavigisassatut pilersaarut manna ATASSUT-ip 2008-imi augustimi nuna tamakkerlugu ataatsimeersuarnerani saqummiunneqarlunilu akuersissutigineqarpoq.

Tunngavigisassatut pilersaarummi isummat tunngaviusut Kalaallit Nunaanni partiimi nutaalerisumi ATASSUT-mi isummatut pigineqartut allaaserineqarneri misissuataarsinnaavatit.

Partiip tunngaviusumik isumai aammalu nalinginnaasumik anguniagai partiip 29. april 1978-imi pilersinneqarmalli allanngoratik inissisimapput, politikikkulli sulineq inuiaqatigiinni ineriartorneq peqatigalugu ingerlaavartumik naleqqussarneqartarpoq.

ATASSUT partiiuvoq Kalaallit Nunaannut naleqqussakkamik pisortanit pituttorneqanngitsumik kiffaangissuseqartumik kalaallit kulturitoqaanni sorlaqartumik ingerlatsinissamik anguniagaqartoq.

Taaguutip – ATASSUT-ip – isumaatulli, partii inuiaqatigiinni kalaallini assigiinngissuteqaraluartut akornanni ataatsimoorluni atassuteqarnissamik sulissutiginnittuuvoq.

ATASSUT-ip inuiaqatigiit kalaallit sullinniarpai, inuit ataasiakkaat periarfissaat pisinnaatitaaffiilu sapinngisamik siuarsarniarlugit, soorunami allat pisinnaatitaaffi eqqarsaatigalugit ataqqillugillu. Ataqpeqatigiinneq ajunnginnerpaamik inerisarneqassaaq inuiaqatigiinni ataatsimooqatigiiffilikkaat suleqatigiinnerisigut.

ATASSUT-ip sulissutiginiarpaa inuiaqatigiit eqeersimaartut, nutaamik eqqarsartut nunanullu allanut ammasut pilersissallugit, tassanilu inuiaqatigiit tamarmik nukittoqutaassapput. Inuiaqatigiit ineriartortinneqassapput piorsarneqarlutillu inuiaqatigiinni assigiinngitsut tamaasa qanimut suleqatiginerisigut.

ATASSUT-ip inuiaqatigiit akaarinnittut ammasullu pilersikkusuppai. Inuiaqatigiinni kikkut tamarmik, suminngaanneersuugalarunik, inuiaqatigiit ineriartorneranni timitalimmik peqataanissaminnut kajumissaarneqassapput. Taamaattumik pissusissamisoortuinnassaq pisinnaatitaaffiit pisussaaffiillu naligiissut atussallugit, inuiaqatigiit pitsaanerpaamik ingerlasinnaaqullugit.

ATASSUT-ip anguniarumavaa inuit imminnut susassareqatigiittutut misigisimanerata nakussassarneqarnissaa, inuit ataqpeqatigiillutik inuttullu naleqassutsiminnik misigisimallutik inuusinnaaqullugit, inuiaqatigiinni taama amerlanngitsigisunik inoqarfiusumi aseruutaasinnaasumik avissaartuunnerit akuersaarneqarsinnaanngimmata.

ATASSUT-ip inuiaqatigiit nukittorsarniarpai peqatigiinnermi, kikkut tamarmik imminnut ataqpeqatigiillutik inuuffigisinnaasaanni, aammalu nassuerutigalugu inuiaqatigiit inuttussutsikkut isigalugit ikittuunerput aammalu nunarsuup assingani sumi najugaqarneq isigalugu innuttaasut

amerlasuut tamarmik pisariaqartimmassuk inuiaqatigiit nutaaliaasut unammillersinnaasullu ineriartortinneqarnissaat.

Inuiaqatigiit taamatut ittut pilersinniassagaanni pisariaqarpoq innuttaasut inuit oqartussaassuseqariartoreranni sunniuteqaqataanissaat qulakkiissallugu. Aammattaaq pisariaqarpoq inuiaqatigiit inatsisartoqarnerup qanoq sunniuteqarsinnaaneraniq toqqissisimasumik tatiginninnissaat, nuna tamaat aammalu najukkat assigiinngitsut eqqarsaatigalugit.

ATASSUT-ip inuiaqatigiinni kiffaanngissuseqarnissaq sulissutigaa

Inuit nutaaliortumik isumaqarneranni inuit tamarmik immikkut inuunerminnut akisussaaffeqarnissaminnut pinnaatitaaffeqarnissaat tunngaviuvoq.

Inuit ataasiakkaat pinnaatitaaffeqarlutillu pisussaaffeqarput, namminnerlu inuunerminnut akisussaallutik. Inuiaqatigiinnut pitsaasunut naatsorsuutigeqqaagassaq tassaavoq inuit ataasiakkaat tamarmik immikkut suliniuteqarnissaminnut inuttut akisussaanermik misigisimanissaat, kalaallilu inuiaqatigiit ineriartornissaannut ikiorseeqataallutik.

ATASSUT-ip taamaattumik inuiaqatigiinni aqqissuussineq siuarsarniarpaq, inuit ataasiakkaat periarfissaat pinnaatitaaffiilu erseqqissarlugit, taamaalilluni tamanna ataatsimooqatigiinnissamut iluaqutaallunilu nukittorsaataassamat.

Inuit akornanni ataatsimoorneq patajaannerpaassaaq inuit ataasiakkaat piorsaanissaminnut sapinngisamik annerpaamik kiffaanngissuseqarpata aammalu pitsaasumik inuuneqarlutik.

Taamaattumik ATASSUT-ip sukkulluunniit inuit ataasiakkaat pinnaatitaaffii, ilaqutariit ataasiakkaat pinnaatitaaffii aammalu inuit assigiinngitsut ataasiakkaat pinnaatitaaffii tapersorsorniarpai, tamatumalu peqatigisaanik ATASSUT-ip erseqqissarniarpaq pinnaatitaaffiit allat pinnaatitaaffiisa maleruarneqarnissaannut ataqqineqarnissaannullu akisussaaffimmik illuatungilerneqassammata.

ATASSUT isumaqarpoq kalaallini inuiaqatigiinni allat pinnaatitaaffiitut ataqqeqatigiinneq aammalu allat pinnaatitaaffiisa maleruarnissaannut akisussaaffik inuit ataasiakkaat, ilaqutariit akornanni, inuiaqatigiinni assigiinngitsut akornanni, kommunit akornanni aammalu Kalaallit Nunaanni tamarmi nunap immikkoortuisa akornanni suleqatigiinnermi eqqarsaatigineqassasut.

Inuit ataasiakkaat akisussaaffeqarnerisa ataanni kiffaanngissuseq, ilaqutariinnut aammalu inuiaqatigiinni assigiinngitsunut ataatsimooqatigiinnissamut patajaatsumut tunngavissaqalersitsissaaq. Ataatsimooqatigiinnerit patajaannerpaat tassarpiaapput ataatsimooqatigiinnerit, inuit namminneq piuumassutsiminnik suliassat soqutigisallu suliariniarlugit ataatsimoorfii.

ATASSUT-ip inuiaqatigiinni toqqissisimanissaq sulissutigaa

ATASSUT-ip anguniagaa tassaavoq tassaajuarlunilu inuiaqatigiinni toqqissisimaneq pilersissallugu.

Ilumoortoq unaavoq inuiaqatigiinni amerlaqisut ullumikkut toqqissisimanatik inuummata imaluunniit toqqissisimanatik inuunissaminnut ulorianartorsiormata. Tamatumani pivavut

inuaqatigiinni sanngiitsortaasut, aammattaarli innuttaasuni sulisortaasut. Toqqissisimanninnerup tamatuma ilarujussua pisortanit pilersinneqarsimavoq, ilaatigut kukkusumik aningaasaliinerit aammalu naalackersuinikkut amigartumik nakkutilliineq tulleriarinerlu pissutigalugit.

ATASSUT-ip taamaattumik pisortanit sumiginnagaanerup akerlilernissaata qulakkeernissaa sulissutiginiarpaa. Pisortat, tassalu inuit qinigaat aammalu allaffissorneq tamarmi piviusorsiortuussapput aammalu tamatigut tatiginartuullutik inuaqatigiinni toqqissisimaneq qulakkiissagaanni.

Meeqqat, inuusuttut, inersimasut utoqqaallu toqqissisimallutik inuusariaqarput. Inuusutissarsiuteqartut ingerlassapput toqqissisimasumillu ineriartortinneqarlutik. Kikkut tamarmik tusaaneqarnissartik naatsorsuutigisariaqarpaat, nutaamik suliniuteqarnerit allannguutissalluunniit pileraangata, tamatumani inuttut attaviit imaluunniit inuusutissarsiuteqartut ineriartortinnissaannut suliniutit pineqaraluarpataluunniit. Kikkut tamarmik oqartussaasunut ornigussinnaasariaqarput oqariartuutitik pimoorullugit tiguneqassasut qularutigissanagu.

Inuaqatigiinni toqqissisimaneq pilersinniarlugu inuit ataasiakkaat aamma oqartussaasut akornanni, suliniaqatigiit oqartussaasullu akornanni, inuusutissarsiuteqartut oqartussaasullu akornanni, soqutigisaqatigiit oqartussaasullu akornanni peqatigiittoqartariaqarpoq. ATASSUT-ip inuaqatigiinni aqqissuussaaneq naleqquttunngorsarusuppaa, taamaalilluni tamanna tamatigut nunatsinni avataanilu ineriartortinneqartuarsinnaammat.

ATASSUT-ip pingaartillugu anguniagaa tassaavoq inuaqatigiit innuttaasullu ataasiakkaat aammalu suleqatigiit toqqissisimasumik inuunissat ammalu inuaqatigiinni ineriartornermi taakkua peqataasinnaanissaat.

Inuit ataasiakkaat inatsisitigut isumannaatsuunissaasa qulakkeerneqarnissaat nukittorsarneqassapput

Inuk kiffaangissuseqarluni inuunissaminut pisinnaatitaavoq, apequtaatinnagu naalackersuinikkut, upperisarsiornikkut, sumit kingoqqisuunermik imaluunniit qanoq atoqateqartarnermik tunulequtaqarneq, naatsorsuutigalugu tamatuma inuit allat taamatut kiffaangissuseqarnerannut akuulersinnginnissaa.

ATASSUT-ip sukkulluunniit inuit ataasiakkaat inatsisitigut isumannaatsuunissaanni inuit inuttut kiffaangissuseqarnissaasa, inuup nammineq inuttut narrunarsagaannginnissaa, inuup nammineq piginnittussaanerata, naqisimaneqanngitsumik saqqummiussisinnaanerup, qanorluunniit upperisaqarsinnaanerup, peqatigiinnissamut kiffaangissuseqarnerup, ataatsimoorsinnaanermut kiffaangissuseqarnerup aammalu inuusutissarsiornissamut kiffaangissuseqarnerup qulakkeerneqarnissaat sulissutigerusuppaa.

Inuit ataasiakkaat ataatsimoorsinnaanerannut kipitinneqarsinnaanngitsumut ataqqinninnissaq atuutissaaq. Taamaattumik inuit allat inuunerannik, peqqissusiannik pigisaannillu atonerluinermut aalajangersimasumik aalajaatsumillu suliniuteqartoqartariaqarpoq.

Inuit ataasiakkaat inatsisiliortunut aammalu pisortat allaffissornerannut naleqqiullugu inatsisitigut isumannaatsuunissaat nukittorsarneqassaaq. Inatsisitigut isumannaatsuunissap taamaalilluni innuttaasut inatsisinik maleruaasut inatsisinik unioqqutitsisumit pingaernerutillugit isumagineqarnissaat qulakkiissavaa.

Kalaallit Nunaanni eqqartuussisarnermik inatsisit aamma pinerluttulerinermik inatsisit erseqqissuusariaqarput, paatsoorneqarsinnaanatik paasiuminartuullutillu. Inatsisit innuttaasut inatsisitigut isumannaatsuunissaannik illersuissapput.

Kiffaanngissuseq aamma tassaavoq inuk nammineq suliniuteqarnermini pissarsiaqarnissaminut pisinnaatitaaffeqarmat. Taamaattumik ATASSUT sukkulluunniit inuup nammineq piginnittussaanerata siuarsarnissaanut suliniarusuppoq kiisalu aningaasaqarnikkut naalackersuinikkullu kiffaanngissuseq sulissutigerusullugu. ATASSUT-ip aammattaaq partiitut nutaaliortutut inuup nammineq piginnittussaanerata siuarsarnissaa sulissutigerusuppaa.

Inuinnaat aqutsisuunerat inuiaqatigiillu qanittuiniittut ineriartortinneqassapput nukittorsarneqarlutillu

ATASSUT-ip sukkulluunniit inuinnaat oqartussaanerata illersorusuppaa aammalu ATASSUT-ip sukkulluunniit inuiaqatigiit kalaallit inuiaqatigiittut inuttut oqartussaaffeqartutut ineriartortinnissaat sulissutigerusullugu.

Innuttaasut tamarmik immikkut inuiaqatigiinni aqutsinermi oqartussaaqataanissaminnut periarfissaqartariaqarput inuit qinigaannik kiffaanngissuseqartumik qinersisarneq aammalu apeqqutit pingaarutillit toqqaannartumik inunnit taasisutigisarneri aqutigalugit.

Inuit ataasiakkaat aalajangiinernut aalajangeeqataasinnaanerata sunniuteqaqataasinnaanerallu qulakkeerniarlugit taakkua inunnut ataasiakkaanut sapinngisamik qanittumik aalajangerneqartariaqarput. Taamaalilluni qulakkeerneqartariaqarpoq aalajangiinerit annertunerusut pilersinnagit aammalu paasisutissiinissamut oqallinnissamullu periarfissamut naammattumik piffissaqarnissaq. Tamatumani qulakkeerneqassaaq innuttaasut ataasiakkaat inuillu qinigaannut sinniisuutit aalajangiinerit aalajangerneqartut kingunissaannik siumut isiginnillutillu paasisimasaqarnissaat.

Paasisutissiisarnermik teknologii nutaaq naalackersuinikkut apeqqutit pillugit paasisutissiisarnernup ammasuunissallu pitsaanerulersinnissaannut atorneqartariaqarpoq taamalu innuttaasut naalackersuinikkut aalajangiinernut toqqaannarnerusumik peqataalersillugit.

Isumaginninnermi politikki

ATASSUT partiiuvoq nutaaliortoq kiffaanngissutsikkut anguniakkanik innuttaasunut tamanut pingaartitsisoq, ATASSUT-illu isumaginninnikkut politikkia tassaavoq inunnut ataasiakkaanut isumaginninnikkut toqqissisimaneq sapinngisamik annerpaaq kiffaanngissuseqarfiusoq namminersorfiusorlu ataatsimoortissallugu. Taamaattumik pisariaqarluinnarpoq isumaginninnikkut atasinnaasumik isumannaatsumillu attaveqaateqarnissaq, inuiaqatigiinni sanngiinnerusut aammalu innuttaasut tamakkerlutik naatsorsuutigisinnaasaat.

Pingaartuuvoq Kalaallit Nunaat tamakkerlugu siumut sammisitamik aammalu pikkorissuseqarfiusumik isumaginninnikkut kiffartuussineqassappat. ATASSUT-ip taamaattumik sulissutigeqqikkusuppaa pisortat isumaginninnikkut sullissinerat assigiiartuussasoq paasiuminartuullunilu, taamaalilluni isumaginninnikkut sullisseriaaseq paasiuminarnersammat ataqatigiinnerullunilu. Innuttaasut ataasiakkaat ilaqutariillu aaqqissuussinerit inuiaqatigiinnit suliarineqartut erseqqissumik paatsoorneqarsinnaanngitsumillu takusinnaasariaqarpaat

paasisinnaasariaqarlugillu. Innuttaasut kikkulluunniit, apeqqutaatinnagu pineqartut sumi najugaqarnerat, isumaginninnermi piaartumik sullissineq piviusorsiorlorlu naatsorsuutigisinnaasariaqarpaat.

Inunnik isumaginninnermi isumannaatsumik attaveqaatit atasinnaasut piorsarneqarsinnaassappata aammalu inuiaqatigiinni sanngiinnerpaanut siumut sammisitamik suliniuteqarneq aallartinneqarsinnaassappat, naatsorsuutigeqqaagassaavoq Namminersorerullutik Oqartussat kommunillu akornanni pitsaasumik kingunissalimmillu suleqatigiittoqassappat. Aammattaaq naatsorsuutigeqqaagassaavoq inunnik isumaginninnermik suliassaqarfimmi suliniuteqartoqarnissaanut inuiaqatigiit pisariaqartitaasa aaqqissugaasumik alaatsinaanneqarnissaat.

Inunnik isumaginninnermi kiffartuussinnermi inuit ataasiakkaat aallaaviusariaqarput inuit ataasiakkaat pisinnaatitaaffii pisariaqartitaallu ataqqillugit. Tamanna pitsaanerpaamik pissaaq pitsaasumik siunnersorneqarnikkut ilitersorneqarnikkullu, inuit ataasiakkaat piginnaasaat nukissaallu qitiutillugit.

Inuiaqatigiinni sanngiinnerpaanut pitsaanerpaamik kiffartuussineq aammalu siumut sammisitamik suliniuteqarneq sukkulluunniit pissaaq, tamatumanilu pingaartumik pineqarlutik:

Innuttaasut, timimikkut innarluuteqarnerik pissutigalugu imminnut pilersorsinnaanngitsut. Innuttaasut, eqqarsartaatsimikkut innarluuteqarnertik pissutigalugu immikkut pisariaqartitsisut. Innuttaasut, ataavartumik eqqarsartaatsimikkut timimikkullu innarluuteqartut taamaattumillu inuunerannik inuiaqatigiit oqilisaassinissaannik immikkut pisariaqartitsisut. Innuttaasut, inuttut inuuniarnerminni atukkatik pissutigalugit imminnut pilersorsinnaanngitsut. Innuttaasut, namminneq pisuussutiginggisaminnik inuiaqatigiit ikiuinissaannik, isumaginninnissaannik aamma/imaluunniit paaqqutarineqarnissaminnik pisariaqartitsisut.

Pisortat inunnik isumaginninnermi kiffartuussinerat ullumikkutut aaqqissuussaattillugu kommunit siullermik tassaapput kiffartuussinnermik siunnersuinermillu isumaginnittussat. Kisiannili qiviraanni assigiinggisuterpasuit takkussinnaasut, apeqqutaatillugu kommunimi sorlermi innuttaasutut inissisimaneq, aammalu qiviraanni kommunit tamangajammik inunnik isumaginninnermut suliassaqarfimmi sulisunik atorfinitsitsinissaminnik sulisumillu pigiinnarnissaannik ajornartorsiuteqartut, taava ATASSUT-ip inunnik isumaginninnermi inatsisiliap allangortinnissaa kiisalu suliassaqarfimmi tassani Namminersorerullutik Oqartussani kommuninilu nammagassat suliassallu agguattaarnerisa allangortinnissaat sulissutiginiarpai.

Nutaalerisutut ATASSUT-ip kissaatigiuarsimavaa isumaginninnermi aningaasartuutit annertuneroqisumik inunntut sulilersitsinissamik namminerlu ikiornissamik siunertaqassasut, uninngaannartunik ikiuinerminngarnit. Taamaattumik inunnik isumaginninnermi periaaseq imatut aaqqissuunneqartariaqarpoq inuttut atukkat qaangerniarlugit nammineerluni suliniuteqarneq imminut akilersinnaasunnngortillugu.

Tamatuma peqatigisaanik pingaaruteqarpoq inuit ataasiakkaat ilaqutariillu kiffanngissuseqarnermik annertunerusumik aammalu qinigassanik amerlanerusunik tunissagaanni, tamatamani soorlu inunnik isumaginninnikkut kffartuussinerit pineqartillugit. Ilaqutariit naqisimaneqanngitsumik namminersortut pisortalluunniit kiffartuussinerinik toqqaasinnaasariaqarput. Suliassaqarfimmi tassani naqisimaneqanngitsumik unammilleqatigiinnissaaq innuttaasunut kiffartuussinnermik qularutissaanngilluinnartumik pitsanngortitsissaaq.

Taamaatumik ATASSUT-ip suleriaaseq siuarsarusuppaa, tamatumani inuit ataasiakkaat ilaqutariillu namminneerlutik kiffartuussinerit assigiingitsut pisiarisinnaangorlugit, soorlu nalinginnaasumik nakorsiarneq, kigutit nakorsaat, meeqqanik paaqqinnineq aammalu namminersortumik pisortatigoortumilluunniit angerlarsimaffimmi ikiorteqarneq.

Inunnik isumaginninnermut suliassaqarfimmi namminersortumik kiffartuussinerit akileraarutinit akilerneqartartut ingerlaartinnerisigut suliassaqarfimmi tamatumani pitsaassuseq qaffassarneqassaaq tamatumalu peqatigisaanik naqisimaneqanngitsumik toqqaasinnaaneq, naqisimaneqanngitsumik unammilleqatigiinnissaq aammalu inunnik isumaginninnermi naapertuilluarneq qulakkeerneqassallutik.

Inuiaqatigiinni atugarliornerpaat qanoq sullisissallugit inuiaqatigiit uuttortarneqarsinnaasariaqarput. Inuiaqatigiit aammattaaq inuit periarfissinnissaannut piginnaaneqarnermikkut uuttortarneqarsinnaasariaqarput. Kikkulluunniit inuunermit pitsaasumit immikkoortinneqassanngillat. Taamaattumik taakkua inuiaqatigiinni sanngiinnerusut ikiorserneqarnissaannut sannginerusut akisussaaffeqarnissaminnut ileqqorissaarnissaminnullu pisussaaffeqarput, uagullu naalakkersuineq eqqarsaatigalugu inuiaqatigiussutsitsinni inunnut nammineersinnaanngitsunut aammattaaq akisussaaffeqarluta.

Inuiaqatigiinni isumaginninnikkut isumalluutissat sunniuteqarluartuullutillu pitsaasuusariaqarput, taamaalillutik innuttaasut ataasiakkaat ilaqutariillu sanngiillisimasut, ilaqutariillu toqqissisimasumik pitsaasumillu inuunerminnik ingerlatsisinnaanngitsut pisariaqanngitsumik utaqqisinnagit pisortaniit taparserneqarnissamik ikiorneqarnissamillu neqeroorfigineqassallutik.

Atortussaq tassaavoq suliniuteqarnissaq inuiaqatigiit namminneq pisariaqartitaannik kissaatigisaannillu tunngavilik ataqqinninnerlu kiisalu taakkua inuiaqatigiinni ataatsimoornissamut periarfissaannik nukittorsaasoq. Tamanna pissutigerpiarlugu ATASSUT-ip tamatigut innuttaasut ataasiakkaat pisariaqartitaat aallaavigisarpai qanoq periaaseqarneq aallaaviginagu.

Meeqqat inuusuttuaqqallu

ATASSUT-ip meerartavut inuusuttuarartavullu peroriartornerminni sapinngisamik pitsaanerpaanik atugaqarnissaat qulakkeerusuppaa. Tamanna siullerpaamik qulakkeerneqartariaqarpoq angajoqqaat meeqqamik inuusuttuarartamillu perorsarnissaannut pitsaanerpaanik atugassaqartinneqarnerisigut.

Angajoqqaat meeqqaminnik perorsaanerminnut akisussaaffimmik isumaginnissinnaanngippata taava pisortat erniinnarluinnaq ikiuunnissaminnut siunnersuinissaminnullu sassartariaqarput.

Ilaqutariit avissaartortinneqassanngillat, sapinngisamilli ataatsimoornissaminnut ikiorneqartariaqarlutik. Tamanna angajoqqaat oqartussaasunut saaffiginninnissaanni toqqissisimanartuusariaqarpoq, ikiorneqarnissaq siunnersorneqarnissarlu pisariaqartinneqalerpat.

Meeqqanut inuusuttuaqqanullu ulluinnarni inuunerminni toqqissisimannginnermik sumiginnagaanermillu sunnersimaneqartunut, assersuutigalugu soorlu ilaqutariinni atornerluinermik pissuteqartumik, taava pingaaruteqarpoq taakkua atugaat piaartumik aalajangersimasumillu ikiorserneqassappata.

Aallaaviatigut ilaqtariit iluanni ajornartorsiutit aaqqinneqasapput. Tamanna ajornassappat meeqqat inuusuttuaqqallu angerlarsimaffimminnit peerneqarallarsinnaanerat pineqalersinnaavoq.

Angerlarsimaffiup avataanut inissiinissaq pisariaqalerpat angerlarsimaffiup avataanut inissiineq FN-ip meeqqat inuusuttuaqqallu pisinnaatitaaffii pillugit isumaqatigiissutaa naapertorlugu pisariaqarpoq, taamaalilluni inissiinissaq pilersinnagu aalajangersimasumik piffissalerneqarluni, meeraq imaluunniit meeqqat qaqugu angerlaqqissanersut.

Paasinarsissappat piffissaliussap qaangiunnerani angajoqqaat meeqqap/meeqqat tigungissaannut piareersimanngitsut, taava nutaamik naliliisoqartariaqarpoq meeraq/meeqqat qaqugu angajoqqaaminnut angerlarsinnaanersut.

ATASSUT-ip ulloq unnuarlu paaqqinniffiit meeqqat pitsaasumik peroriartornissaannut pitsaanerpaanik atugassaqartinneqartariaqarnissaat sulissutiginiarpaa, angajoqqaat taamaaliorinnaanngikkallarneranni. Suliassaqarfimmi tamatumani pisariaqartinneqartut peqqissaartumik naliliivigineqartariaqarput. Anguniagaq tassaassaaq ulloq unnuarlu paaqqinniffinnut killiliussat isumannaatsut piviusorsioertullu nassaariniarnissaat.

Suut tamaasa eqqarsaatigalugit paaqqinniffiit meeqqat/inuusuttuaqqat ulluinnarni najortagaasa kiisalu angajoqqaat akornanni oqaloqatigiittarnerit pitsaanerpaassapput.

Angajoqqaat namminneq perorsaanerisa aammalu ilaqtariit inuttut namminneq kiffaanngissusiata saniatigut meeqqat inuusuttuaqqallu pisortat inissiaanni siunertalimmik inuuneqarnissaat qulakkeerneqassaaq. Pingaartuuvoq meeqqat inuusuttuaqqallu inuiaqatigiinni pitsaasumik inissisimanissaannik tunissallugit, tamatumalu peqatigisaanik sunngiffimmi periarfissat pitsaasut peqqinnartullu qulakkeerneqarlutik, taamaalillutik taakkua sunngiffimmi peqqinnartunik ineriartorfiusunillu avatanngiiseqarsinnaassammata.

Pissutsini inersimasunut – meeqqanut inuusuttuaqqanulluunniit ulluinnarni atassuteqarnermut atatillugu paasinarsissappat angajoqqaat meeqqaminnik inuusuttuarartaminnilluunniit toqqaannartumik sumiginnaasut, imaluunniit pasitsaanneqarluni, meeqqat inuusuttuaqqallu angajoqqaatik sianigisaqartinnagit pissutsini, taakkununga uloriaqarsinnaasuni akuusimasut, taava inersimasut piaarnerpaamik akuliuttariaqarput.

Innarluutillit

ATASSUT-mut aammattaaq pingaaruteqarluinnarpoq innarluutilinnut politikki tamatigut inunni ataasiakkaani aallaaveqarnissaa. Inuiaqatigiinni innuttaasut allat assigalugit innarluutillit naqisimaneqanngitsumik katsorsarneqarnissaminni sapinngisamik amerlasuunik toqqaasinnaasariaqarput.

ATASSUT-ip kissaatigaa innarluutillit inuiaqatigiinni ikiorsiisinnaasut ikiorseerusuttullu aammattaaq suliffeqarnermi peqataasinnaanissaminnut ilinniartitaanissaminnullu periarfissanik tunineqartariaqartut.

Innarluutillilli sanngiinnerusumik atugaqartut nammineersinnaanngitsut taamaattumillu paaqqutarineqarnissaminnik tapersorneqarnissaminnillu pisariaqartitsisut aaqqissuussinernik inuit ataasiakkaat pisariaqartitaannut naleqqussarneqartunik neqeroorfigineqarsinnaasariaqarput.

Inarluutillit ilaqutaasullu toqissisimallutik naatsorsuuteqarnissaat pillugu pikkorissuseqartumik sullinneqartariaqarput.

ATASSUT-ip innuttaaqataasunut annertuumik innarluuteqartunut inissaqarnissap aammalu katsorsartinnissap qulakkeerneqarnissaa sulissutigerusuppa.

Innuttaaqataasunut eqqarsartaatsimikkut timimikkullu ataavartumik innarluuteqartunut, taamattumillu inuiaqatigiit taakkua qanigisaasalu inuunerannut oqilisaataasussamik annertuumik pisariaqartitsisunut erseqqissunik paatsuunganangitsunillu neqerooruteqartoqartariaqarpoq taakkua toqqissimasumik atorsinnaasaannik.

Innuttaasutut allatulli innarluuteqartut inissiat ilusaannik assigiinngitsunik toqqaasinnaasariaqarput. Inissiat innarluuteqartunut naleqquttut nutaaliaasullu pigineqassapput, inunnet ataasiakkaanut ataatsimoortunulluunniit.

Innarluuteqartut inuusunnerit namminneerlutik ineqarsinnaanngitsut najugaqatigiiffinnik naleqqussakkanik neqeroorfigineqartariaqarput, najukkani assigiinngitsunik utoqqaat illuinut innersuunneqaratik.

Utoqqaat

Kalaallit Nunaanni utoqqaat innuttaasut ataqinassusilimmik ataqinnittumillu sullinneqarnissartik pisariaqartippaat pisinnaatitaaffigalugulu, utoqqarnillu isumaginninneq utoqqaat pisariaqartitaat aallaavigalugit tamatigoortumik aqqissuunneqartariaqarluni.

Inuit ataasiakkaat namminnerluinnaq aalajangertariaqarpaat arnaagunik angutaagunilluunniit qaqugu soraarninggussanerlutik. Piumassuseqartunik, periarfissaqarunik peqqillutillu soorunami suliffeqarnermi ingerlaqqinnissaminnut periarfissaqartariaqarput. Paarlattuanilli aamma kukkuneruvoq inuit suliffeqarnermiiginnarnissaannut pinngitsaalissagaanni ukiut soraarninngorfissatut inatsisitigut aalajangersakkat angutserlugit, taakkua misigisimagunik taamaaliornissaminnut nukissaqaratik.

Taamaattumik ATASSUT-ip suliassaqarfimmi tassani eqaannerusumik aqqissuussinissaq kissaatigaa, taamaalilluta sulinermit soraarninngorluni inuunissaq pissusissamisoortumik annikillisikkiartuaassagatsigu. Tamanna soorlu pisinnaavoq ullup affaani sulisarnikkut, akissarsiat aqqissuunneqarnerannik tapertaqartillugu.

Utoqqarnut pisortanit soraarnerussutisiaqartunut atugassarititat assigiiaarnerusariaqarput, apeqqutaatinnagu nunap suatungaani utoqqalinertik atorusunnerlugu aalajangeraluarpassulluunniit.

Utoqqartatta soorunami aamma namminneq aalajangersinnaasariaqarpaat sumi najugaqarusunnerlutik. Nammineq angerlarsimaffimmi sapinngisamik sivisuumik najugaqarneq periaasiuvoq toqqissisimanarlunilu pitsaasoq, utoqqaallu namminneq angerlarsimaffimminiiginnarnissaat qulakkeersinnaassagutsigu taava atortussanik atugassiinissarput isumagisariaqarparput aammalu angerlarsimaffimmi ikiortinik naammattumik pikkorissuseqartunik periarfissiilluta.



Tamatumuuna utoqqaat isumannaatsumik namminneq angerlarsimaffimminniiginnarsinnaanerat qulakkeerneqassaaq, taamaallaalli taakkua tamatuma qanoq sivisutiginnissaa namminneq kissaatigippassuk. Taamaattumik aammattaaq utoqqarnut inissianut nakkutigineqartunut utoqqaalluunniit illuinut pisinnaanissaaq periarfissaqartariaqarpoq.

Pinaveersaartitsineq

Partiit nutaalerisutut ATASSUT-ip kissaatigiuarsimavaa isumaginninnermi aningaasartuutit inunnut sulilersitsinissamut namminerlu ikiornissamut sammiveqartumik atorneqarnissaat, uninngaannartut ikiorsiivigineqarneranninngarnit. Taamaattumik isumaginninnermi kiffartuussineq aningaasartuutit tunniunneqanngisaannassaaq. Tamanna inunnut ataasiakkaanut inuiaqatigiinnuunniit naammaginngilaq. Taamaattumik aamma pingaaruteqarpoq isumaginninnermi suliniuteqarneq pinaveersaartitsisumik siumut aqqissuullugu annertusarneqarpat imaalillugu, sukkulluunniit makkua siuarsarneqarlutik:

Ilaqutariit ineriartornissaat

Meeqqanut inuusuttuaqqanullu atugassarititat pitsaanerpaat  
Isumaginninnermi kingornuttakkat pitsaanngitsut piiarnissaat  
Ilinniartitaaneq sulilersitsinerlu suliffissaaleqinerminngarnit salliutillugit  
Nakuuserluni ilionerninngarnit oqaloqatigiittarneq pingaernerutillugu  
Inuup imminut inoqatiminullu akisussaaffeqarnera  
Nammineq piunassutsumik isumaginninnikkut suliniuteqarneq

ATASSUT-ip pinaveersaartitsinermik suliniuteqarnerup innuttaasunik, sullissiveqarfinnik, kattuffeqarfinnik kommuninillu pissarsissutaasumik uummaarissumillu oqaloqatigiittarnikkut ingerlanissaa sulissutiginiarpaa.

Ilaqutariit inuiaqatigiittut katitigaanitsinni qitiupput. Ilaqutariittut patajaatsumik ataatsimoorneq tassaavoq inuit ataasiakkaat toqqissisimasumik ineriartornissaannut aammalu inuit ataasiakkaat inuiaqatigiit ineriartornissaannut akisussaqaataanissaannut nalunaaqutaasussaaq.

ATASSUT-ip ilaqutariit imaalillugit patajaallisarnissaat kissaatigaa, taakkua aammattaaq siunissami ataatsimoornermut toqqissisimanermullu takussutissiaassallutik. Taamaattumik pingaartuuvoq ilaqutariit ineriartornissaanni atugassarititat eqqarsaatigineqarsinnaasut pitsaanerpaat imaalillugit aqqissuunneqassappata, ilaqutariit meeqqat peroriartorneranni tunngavissarititanik pitsaasunik periarfissinneqarlutik.

Angajoqqaat meeqqat qanimut avatangiisaasa toqqissisimanartuunissaannut akisussaapput, oqartussaasullu periarfissat tamaasa atorlugit angajoqqaat tunngavissinniartariaqarpaat taakkua inuiaqatigiit ineriartornissaanni toqqissisimallutik peqataanissaannut.

ATASSUT-ip ilaqutariit meerartallit pitsaasunik tunngavissaqarnissaat sulissutiginiarpaa. Oqartussaasut angajoqqaat meeqqaminnik perorsaanissaannut akisussaaffiinik tiguisariaqanngillat. Angajoqqaat oqartussaasullu ataatsimoorlutik ilaqutariittut siunertaqarluartumik pingaartitassatullu inuunissamut tunngavissanik pilersitsinnaasariaqarput.

ATASSUT-mut ilaqutariit naleqassusiat naammattumik nalilivigineqarsinnaanngilaq, tassani kulturikkut tunngavipput tamarmi ippoq. Taamaattumik ATASSUT-ip ilaqutariit pitsaanerpaamik

kiffartuunneqarnissaat sulissutigeqqinniarpaa, ikiorneqarnissamik pisariaqartitsineq suogaluartorluunniit pilissappat.

Suliffeqarnermi piffissat suliffiit sulinermilu atugassarititat imatut eqqaatsigisariaqarput angajoqqaat meeqqaminnik najuinissaminnut pitsaasunik periarfissaqassallutik. Taamaattumik ATASSUT-ip aaqqissuussinerit angajoqqaanut piviusorsiortumik aningaasaqarnermut periarfissiisut sulissutiginiarpai, taamaalillutik taakkunannga angajoqqaat arlaata meeqqat nukanganerpaaffianni suliffeqarnermit angerlarsimanissaq toqqarsinnaallugu.

Ilaqutarinnut namminneq angerlarsimaffimmik pilersitsinissaminnut periarfissaqanngitsunut, taamaattorli pisortat inissiaataanni attartortittakkani najugaqartariaqartunut ATASSUT-ip ilaqutariit ataasiakkaat ineqarnermut aningaartuutaasa appartinnissaat sulissutiginiarpaa, taamaalilluni ineqarnermut aningaasartuutit ilaqutariit agguaqatigiissillugit akilersinnaasaattut tamarmiusutut qaffasissuseqalersillugit. Tamatumunnga peqatigitillugu atugassarititat pilersinneqarnissaat sulissutiginiarparput, taamaalillutik ilaqutariit namminneerlutik namminerisamik inissiaq sanasinnaaniassammassuk sanatilluguluunniit, tamatumani ilaqutariinnut ataatsinut inissiaq piginneqatigiilluniluunniit inissiaq pineqaraluarpalluunniit.

Pisortat kiffartuussinerannut tunngatillugu ATASSUT-ip ilaqutariit kiffaanngissusermik annerusumik qinigassanillu arlaqarnerusunik tunineqarnissaat kissaatigaa. Taamaattumik ATASSUT-ip ilaqutariit pisortat aammalu namminersortut kiffartuussinerisa akornanni kiffaanngissuseqarlutik toqqaasinnaanerat sulissutigeqqinniarpaa, tamatumani tassaasinnaasunik meeraaqqeriviit, meeqqeriviit, sunngiffimmi ornittakkat, meeqqanut angerlarsimaffiit, utoqqarnullu angerlarsimaffimmi kiffartuussineq.

ATASSUT-ip sukkulluunniit kalaallini inuiaqatigiinni innuttaasut kikkulluunniit timikkut, tarnikkut inuttullu atukkatigut atugarissaarnissaat sulissutiginiarpaa. ATASSUT-mut pingaaruteqarpoq kalaallit inuiaqatigiit ataatsimoorlutik peqqinnissaqarfiup pitsaasumik ingerlasup pilersinnissaanut tunngavissanik pilersitsissappata. Oqartussaasut inatsiseqarnikkut killiliussat qulakkiissavaat inuillu ataasiakkaat namminneq akisussaaffigalugu peqqissuunissartik namminneerlutik isumagissallugu.

ATASSUT-ip takorluugaa tassaavoq Kalaallit Nunaanni peqqinnissaqarfik aaqqissuullugaassasoq, sulisussa qarluarluni aammalu pisariaqanngitsumik utaqqisitsigani katsorsaanernik pilataanernillu isumaginninnissaminut naammassisaqarsinnaassaluni. Kikkulluunniit tamarmik nappaatimik katsorsarnissaannut sukkulluunniit periarfissaqartariaqarput, pisortallu napparsimmaveqarfiat napparsimasunik katsorsaanermi qitiujuassaaq, aammattaarli tamatuma peqatigisaanik inuit ataasiakkaat iluaqutigisinnaasaminnik neqeroorutinik toqqaasinnaasariaqarlutik.

Peqqinnissaqarfippu imaalillugu aaqqissuunneqartariaqarpoq uagut napparsimalersilluta toqqissimasumik saaffiginniffissaqarsinnaalluta. Taamaattumik ATASSUT aammattaaq aningaasaliussat peqqissuseqarnissatta tamatsinnut toqqissisimanartup qulakkeernissaanut akuersissutigissallugit piareersimavoq.

ATASSUT-mut pingaartuuvoq erseqqissassallugu peqqinnissaqarfik innuttaasut pillugit atammat, paarlattuaninngitsoq. Nappaatinut ajuuteqarnernullu atatillugu pingaartuuvoq inuttut nammineersinnaassutsitsinnik paaaffigineqannginnissarput, akerlianilli ataqqinnittumik ataqqinassusilimmillu saaffiginninnissaq misigissallugu. Taamaattumik pingaarutilerujussuuvoq

Kalaallit Nunaanni peqqinnissaqarfimmi kikkut tamarmik sulinerminni atugarisaat pitsaasuullutillu toqqissisimanartuussappata.

Katsorsartinnissap qularnaaveeqqusernissaa

ATASSUT-ip takorluugaa tassaavoq innuttaasut piffissami aalajangersimasumi katsorsartinnissamut piviususorsiortumik aalajangersimasumillu qularnaveeqqusiisoqassasoq.

Napparsimasut pilattarsinnissaminnut ukiup affaani ukiorluunniit tamaat utaqqisariaqanngillat. Taamaattumik Kalaallit Nunaanni inatsisiliortut sukkulluunniit napparsimasunut utaqqisut allattorsimaffiinnik siunertalimmik annikillisaasariaqarput.

Katsorsartinnissaq pisortat peqqinnissaqarfianni Inatsisartut killiliussaasa aalajangersimasut iluanniitillugu qularnaveeqquserneqanngippat napparsimasoq nammineerluni Danmarkimi nunamiluunniit allami suliaritinnissaminik naqisimaneqarani toqqaasinnaasariaqarpoq.

Teknikkikkut periarfissaqarpat, aammalu nakorsaqaarnikkut aningaasaqaarnikkullu isumannaatsuuppat, soorunami Kalaallit Nunaanni katsorsartinnissamut periarfissaqartariaqarpoq. Tamatuma peqatigisaanik Kalaallit Nunaanni peqqinnissaqarfiup nunani allani peqqinnissaqarfinnik suleqatigiinnissamik isumaqatigiissutit erseqqissut oqilisaataasullu sulissutigisariaqarpai.

Napparsimmaviit

Kalaallit Nunaanni napparsimmaviit ineriartortinneqartuassapput, napparsimmavinnullu aningaasaliissutit tamatigut napparsimmaviit ataasiakkaat pisariaqartitaat naapertorlugit takuneqarsinnaasariaqarlutik.

Dronning Ingridip Napparsimmavia qitiusumik napparsimmavittut atuuttuassaaq aammalu inuiaqatigiinni inissisimanini tunngavigalugu ineriartortinneqassalluni.

ATASSUT-ip kissaatigaa siunissami peqqinnissaqarfimmut aningaasaliissutit naammassisani tunngaveqartut aningaasaliissutigineqartassasut, peqqinnissaqarfillu ukiut tamaasa napparsimmavinni nunaqarfinnilu nakorsiartarfinni ataasiakkaani suliarineqartut pillugit nalunaarusiortassasoq.

Peqqinnissaqarfimmi nunap immikkoortuini pilersaarutit ingelaqqissapput. Taamaaliornikkut napparsimasut annertoorsuunngitsumik aammalu pisariunngitsumik pilattartittussat katsorsartittussalluunniit sapinngisamik piaarnerpaamik suliassaqarfimmi qaninnermi sulissunneqarsinnaassapput.

Kalaallit Nunaanni katsorsartinnissamut periarfissat

Maani Kalaallit Nunaanni teknikkikkut periarfissaqarpat, aammalu nakorsaqaarnikkut aningaasaqaarnikkullu isumannaatsuuppat, soorunami Kalaallit Nunaanni katsorsartinnissamut periarfissat pilersissavavut. Namminerli pingaartinnissamut nakkarniinnassanngilugut isumaqarlutalu nunatsinni suut tamaasa pitsaanerusemik suliarisinnaallugit.

Inuttussutsitsigut tunngavissakitsuarsuuvugut. Ajornartorsiut tamanna piareersimaffigisariaqarparput maani massakkorpiarlu napparsimasunik katsorsaasarneq aalajangersimasoq immaqqa pilersikkumaarlugu. Apeqqutaalersinnaavorli aningaasaqarnikkut sulisoqarnikkullu aammattaaq suliassaqarfimmi tamatumani ineriartorneq malittarisinnaanerlutigu.

ATASSUT-ip kissaatiginngilaa imatut pisoqassasoq nunatsinni maani katsorsartinnissamut periarfissat arlaqartut ukiut arlallit ingerlaneranni pilersissagutsigik, aningaasaqarnermik sulisoqarnermillu pissuteqartumik ineriartornissaq malittarisinnaanngikkutsigu. Tamanna katsorsaariaatsimik ikiorfeqarani pisoqalisussamik, napparsimasunullu pitsaanerpaamik isumannaannerpaamillu katsorsartiffiusinnaanngitsumik kinguneqaannassaaq.

Taamaattumik nalilersoqqissaartariaqarparput katsorsaariaaseq aalajangersimasoq Danmarkimi napparsimmavimmi maanngarnit pitsaanagerusumik tunniunneqarsinnaassanersoq. Siullerpaamik napparsimasup pitsaasumik atugaqarnissaa eqqarsaatigalugu, aammattaaq aningaasaqarnikkut akiligassat eqqarsaatigalugit.

Nunaqarfinni peqqinnissaq

Nunaqarfinni peqqinnissakkut sullinneqarneq unmmillerfigissallugu tunngavissaqarajunngilaq. Taamaattumilliuna pisortani peqqinnissaqarfik nunaqarfiit peqqinnissaqarfikkut isumannaatsumik sullinneqarnissaannut immikkut pisussaaffeqartoq.

Nunaqarfinni nakorsiartarfiit ullutsinnut naleqquttuusariaqarput, minnerpaamillu nunaqarfinni tamani inuk ataaseq peqqinnissaqarfinnut tunngasunik ilinniagaqarsimasoq sulisuutinneqartassalluni, taamatuttaarlu nunaqarfimmiut nunaqarfiup illoqarfiullu akornanni napparsimaleriataarnissaminni akeqanngitsumik angallanneqarsinnaasariaqarlutik.

Tarnikkut katsorsartinneq

Tarnikkut napparsimasut sammineqarnerunissaat pisariaqarpoq. Kalaallit Nunaanni peqqinnissaqarfiup innuttaaqataasut tarnimikkut naalliuuteqartut katsorsarsinnaasariaqarpai aammalu qaniginerusat peqatigalugit taakkua iluaqutissaat isumagineqarlutik, tamatumunnga namminneerlutik pisinnaanngippata.

Inuit tarnimikkut erloqissuteqartut/nappaateqartut alaatsinaanneqarnerat pitsaasuussaaq piviusorsioruullunilu, tamanna aammattaaq inunnut tarnimikkut erloqissuteqarnissaminnik navianartorsiortunut atuuttariaqarpoq, pissutigalugu tarnimigut nappaateqartup nappaatimi nassuerutiginnissaa amigaatigilersinnaammagu, tamatumalu aamma kingunerissallugu inuttut atukkat, timip tarnillu aserornerat.

Nappaatip nassuerutiginnissaata amigaataanerata pinngitsaaliissummik unitsitsinerit suliassallu kajungernanngitsut, pinngitsoorneqartariaqaraluartut pisariaqalersisinnaavai. ATASSUT-ip taamaattumik kissaatigaa tarnikkut katsorsartinnermik suliniut pitsaanerulersinneqarlunilu ineriartortinneqassasoq, pingaartumik meeqqani inuusuttuaqqanilu tarnimikkut nappaatilinni.

Pingaarteqarpoq katsorsartinnerup ingerlanera naammaginartoq ingerlatissagaanni sulisutigut pitsaasunik atugassaqarnissaq. Napparsimasup tarnikkut nappaatillit immikkoortortaanni uninnganermi inuttut nammineq inuuneqarnissaa ataqineqassaaq.

Nakorsat namminersortut

Nakorsat kigutillu nakorsaasa suliassaqarfianni namminersortutut nakorsaqaarnissaa ATASSUT-ip kissaatigaa, pissusissaviatut tamatumunnga tunngavissaqarpat. Tamanna ilaqtariit peqqinnissaqarfimmi suliani toqqaasinnaassuseqarnerannik pisariaqartinneqalersumik periarfissiissaaq.

Aaqqissuussineq piviusunnngortinneqartariaqarpoq nakorsat kigutillu nakorsaasa namminneq nakorsartitsisarnissaminnut atugaasa oqilisaassiviginerisigut, tamatumani ilaqtariit namminneq kiffartuussinerit assigiinngitsut pisiarisinnaanngussallugit, taakkua pisortaninngaanneersuuppata namminersortuninngaanneersuuppataluunniit. Peqqinnissaqarfimmi suliatigut unammilleqatigiinneq aqcutigalugu innuttaasut peqqinnissakkut sullinneqarnerat pitsaanerpaatut eqqarsaatigineqarsinnaasoq qulakkeerneqassaaq.

Naartuersittarneq

Ullumikkut naartunaveersaanermut periarfissani atuuttuni piumassutsimik naartuersittarneq qaqtigunnaq atuuttariaqarpoq. Anguniagaq tassaassaaq kissaatiginngisamik naartulertarnerup pinngitsoortivinnissaa, tamannalu naartuersittarnerit naartunaveersaatit sakkussatut atornerisigut pinngitsoortinneqassalluni.

Taamaattumik ATASSUT-ip meeqqat atuarfianni inuiaqatigiillu tamaasa eqqarsaatigalugit atoqatigiinnerup qaammarsaatigineqarnera sulissutigiumavaa. Paasisitsiniaaneq siunertaqarluartuussaaq ilungersuunneqarlunilu naartunaveersaatit atorneqaarnissaat eqqarsaatigalugu, taamaalilluni naartuersittarneq kissaatiginngisamik naartulertarnermik pissuteqartoq pinaveersaartinneqarluni.

Naartuersinnerup arnap nammineq naartunnginnissaminik aalajangigassaa ATASSUT-ip ataqqigaluarlugu taamaattoq eqqaamaneqassaaq arnamut timikkut tarnikkullu kingunerisassat avataatigut pilatsinneq tamatumani pineqartarmat, kingunerlutsitsinernik aseruuttoornernillu nassataqarsinnaasoq, taamalu naartusinnaajunnaarnermik.

Peqqinnissamut nammineerluni ataatsimoorlunilu suliniuteqarneq

Innuttaasut ataatsimut isigalugit timikkut, tarnikkut inuttullu atugarisatigut atugarissaarniaraanni naatsorsuutigeqqaagassaaq pingaarutilik tassaavoq inuit ataasiakkaat peqqinnissartik ilisimaaralugu siunertaqarlutillu ingerlatissappassuk. Paasinarsissappalli kikkulluunniit peqqinnissap pitsannngortinnissaa kisimik artoraat, taava ATASSUT-ip kissaatigisaa unaavoq tamatta akisussaaqataanermik tigusissasugut. Tamanna ilaqtariinnut, qanimut attaveqaatinut, suliffimmut – naatsumik oqaatigalugu inoqatitsinnut tamanut atuuppoq.

Peqqinnermi tassaangilaq ”nioqqutissaaq” pisortat sullissiveqarfiinit immikkullu paasisimasalinnit uatsinnut taamaallaat ingerlatinneqartussaaq.

Qularutissaangilaq nerisavut, qanoq timigissartiginerput, uisakajaartitaanerput, imigassamik tupamillu atuinerput, inoqatitsinnut tunngassuteqartut il.il. atugarissaarnissatsinnut pingaarutilerujussusut.

Peqqinneq inuunerup pitsaassusissaanik assut tunngaveqarpoq. Peqqinnissatsinni ajornartorsiutivut napparsimmavimmi katsorsartinneq atortorissaariartuinnartunngortillugu ataasiinnarmik ingerlatillugu iluarsii vigisinnaanngilavut. Aammami inuit ataasiakkaat oqarfigiinnarsinnaanngilavut ”illit tamanna nammineq akisussaaffigaat”. Tamatumani suleqatigiinneqartariaqarpoq.

#### Pinaveersaartitsineq

ATASSUT-ip napparsimasunik katsorsartinnerup saniatigut peqqinnissakkut pinaveersaartitsineq pingaartorujussuartut isigaa. Tamatumani pingaartuuvoq timalimmik nammineerluta inooqataanissarput, taamaaliunngikkutta ingerlaqqinnavianninnatta.

Tamakkua pissutigalugit ATASSUT isumaqarpoq kommunini peqqinnissaqarfiit pinaveersaartitsinermut siunnersuisut suleqatigalugit pinaveersaartitsinermik suliassami timalimmik suliniuteqarnissaat. Suliami tamatumani atuarfiit ilinniartitsiviillu suleqatissatut piukkunnaqaat, aammattaarli TV radiulu peqataaninneqartariaqarlutik, najukkani assigiinngitsuni nunamilu tamarmi.

#### Kultureqarnermut sunngiffimmilu sammisassaqtitsinermut politikki

ATASSUT-ip kultureqarnermut sunngiffimmilu sammisassaqtitsinermut politikiani anguniagaavoq inuup pilersitsisinnaanermi nukiisa atugassanngortinnissaat, tamatumuuna innuttaasut ataasiakkaat ulluinnarni inuunerisa pisuunerulersinneqarnissaat pilersinneqassamat. Inuit ataasiakkaat ineriartornissamat periarfissanik pitsaasunik, pilersitsisinnaassusiisa patajaallisarnissaannut kiisalu inuiaqatigiinni inuunerup suliniuteqarlutik inooqataanissaannik tuninissaat kissaatigaarput, inuilla ataasiakkaat sunngiffimmik siunertalimmik imaqtinniarnerannik tunillugit.

Immikkuullarissuunitta attatiinnarnissaat kulturikkut pingaartitatta pigiinnarnissaannut katattussaannngitsumik ataatsimooruteqarput. Taamaattumilluna kulturitta timalimmik tapersernissaa pingaaruteqartoq. Kulturitta patajaallisarnissaa immikkoortitsinermut paarlaanneqassanngilaq. Naaggaluunniit, ATASSUT isumaqarpoq kulturerput inuiaqatigiinnut kulturinullu allanut ammasuunikkut pitsaanerpaamik ineriartortinneqassasoq.

Eqqumiitsuliorluni piginnaasanik takutitsineq, inuttut pikkorissarneq, aap, ataatsimut oqaatigalugu inuttut nammineq nalaatassat isumaginerat, tassaapput namminersorusunnerup ATASSUT-ip inunni ataasiakkaani siuarsarusutaata immikkoortuinut ilaasut.

ATASSUT-ip kikkunnulluunniit tamanut sunngiffimmi sammisassanut periarfissat pitsaasut peqqinnartullu tamatigoortumik neqeroortigineqarnissaat pingaartitaraa. Tamanna inunnut ataasiakkaanut peqqinnerusumik inuunermik tuniseqataassaaq aammalu inuiaqatigiinni ajoqutaasinnaasunut killiliilluni. ATASSUT-ip taamaattumik kulturikkut suliassaqrifiup sunngiffimmilu sammisassaqtitsinermi suliassaqrifiup annertusarnissaat pitsanngorsarneqarnissaallu sulissutiginiarpai.

#### Inissatigut killilissaritit

Pingaaruteqarpoq kulturikkut suliniutinut piginnaasanillu takutitsinernut inissatigut killiliussat pitsaasut toqqissisimanartullu pigineqarpata, taamaattumillu najukkani assigiinngitsuni innuttaasut

illuisa, katersortarfiit, aamma/imaluunniit illut sammisassaqartitsiviit pilersinneqarnissaat allanngutsaalinissaallu tapersorsorpavut. ATASSUT-ip taamaattumik najukkani assigiinngitsuni kulturikkut sunngiffimmilu sammisassaqartitsinermi qitiusoqarfiit taakkua piorsarneqarnissaat iluarsanneqarnissaallu sallerpaatillugit sulissutiginnissaat kissaatigaa.

Eqqumiitsuliortut ilinniartitaanerat

Pilersitsiniarluni eqqumiitsuliorneq qiimmassarneqassaaq – pingaartumik piginnaassuseqarlutik aallartinnialersut. ATASSUT-ip taamaattumik sukkuulluunniit eqqumiitsuliortortatta piginnaasaminnik takunitsinissaminnut periarfissaat kiisalu nunarsuarmioqatitta eqqumiitsulioriaatsitsinnut kulturitsinnullu assisaaqangitsumut ilisimasaqalernissaat siuarsarniarlugu suliniutit suugaluartulluunniit tapersorsorusuppai.

Taamaattumik ATASSUT-ip anguniagaa tassaavoq piffissaq qaninnerusoq eqqarsaatigalugu eqqumiitsuliornikkut tunngaviummik ilinniartitaanissaq kiisalu piffissaq ungasinnerusoq eqqarsaatigalugu eqqumiitsuliornermut ilinniarfissuaq nunanut tamalaanut unammillersinnaasoq pilersinneqassasut.

Piginnaassuseqarneq eqqumiitsuliat pitsaassuseqarnissaannut pigeqqaagassaammat, aammalu nunani tamalaani unammilleqatigiinneq annertusiartormat, Kalaallit Nunaanni eqqumiitsuliornikkut ilinniartitaanermi atualernissamut piomasaaqatit annertuut piomasaaqatigineqartariaqarput. Pingaaruteqarpoq inuusuttut sivisuumik eqqumiitsuliornikkut ilinniartitaanissaat pinngitsoorneqassappat, piginnaassuseqarnerup tamanna attassinnaangippagu.

Kalaallit oqaasii

Oqaasit kulturikkut pingaartitassatta pigiinnarneqarnissaanni immikkoortuupput pingaaruteqartut. Tamanna ilaatigut qulakkeerneqassaaq meeqqat siunertaqarluartumik sukumiisumillu ilinniartitaanerisigut kiisalu inuiaqatigiinni ukioqatigiiaanun tamanut kalaallisut atuagassat qulakkeernerisigut. Taamaattumik ATASSUT-ip sukkuulluunniit kalaallit atuakkiortoqarnerat siuarsarniarlugu sulineq tapersorsorusuppaa.

ATASSUT-ip kissaatigaa Inuit nunaannut tamarmut ataatsimut allattaaseqarnissap pilersinneqarnissaa sukumiisumik sulissutigissallugu. Inuit naggueqatigiit oqaasii assigiinngitsut tamatumunnga qaneqimmata tamanna ajornassanngilaq. Tamanna piviusunngortinneqarpat atuakkat, atuagassiat il.il. tunineqartarnerat malunaatilimmik annertusissaaq. Tamanna saqqummiussanut amerlaneroqisunut kiisalu atuartitsinikkut ilisimatusarnikkullu annertuumik suleqatigiinnermut tunngaviliissaaq.

Eqqumiitsuliorneq inuussutissarsiutit

ATASSUT-ip takorluugaa tassaavoq kalaallit eqqumiitsuliaasa nunatsinni inuussutissarsiutit ilaattut pingaaruteqalernissaat. Taamaattumik ATASSUT-ip pilersitsiniarluni eqqumiitsuliornerup kiffaanngissuseqartumik aammalu Kalaallit Nunaanni tamarmi saqqummersitsinissamut periarfissat qulakkeernissaat sulissutigerusuppaa.

ATASSUT-ip nunatsinni tamarmi sanaaluttartut amerlaqisut suliniuterpassuvinut assigiinngitsunut killissaritit pitsaanerusut aammalu pilersitaasa pitsaanerpaamik tuniarnissaasa

siammarnissaasalu pingaartinneqarnissaat siunertaqarluartumik sulissutigerusuppai, tassaasinnaasumik nunami namminermi tuniniaanermi avammulluunniit tuniniaanermi.

#### Atuakkanik atorniartarfiit

Innuttaasunut atuakkanik atorniartarfiit Kalaallit Nunaanni kulturikkut suliaqarnermi pinngitsoorneqarsinnaanngillat. Innuttaasut tamarmik taamaattumik atuakkanik ajornanngitsumik atorniarsinnaasariaqarput apeqquataatinnagu illoqarfinni nunaqarfinniluunniit najugaqarneq. Innuttaasut sukkulluunniit eqqumiitsulianik kulturimillu nutaanerpaamik aammalu kalaallit kulturikkut kingornussarsiaannik atorniarsinnaasariaqarput.

Ullumikkut Kalaallit Nunaanni atuakkanik atorniartarfiit inissisimanerat qaammarsaanermut, ilinniartitaanermut kulturikkullu suliniutinut atortussat atukkiunnerisigut siuarsaanermut tunngaviuvoq. Tamatumunnga aammattaaq ilanngunneqassaaq innuttaasut paasissutissarpassuarnik Internettikkut aaneqarsinnaasunik amerlaqisunik pissarsisinnaanerannik tunissallugit. Taamaattumik atuakkanik atorniartarfiit sukkulluunniit innuttaasunik kiffartuussinermi pitsaanerpaanik atugassaqartariaqarput.

#### Filmiliorneq

ATASSUT-ip kalaallit filmiliornerat kulturikkut immikkoortortatut iluatinnaatilerujussuartut isigaa oqaatsitsinni kinaassutsitsinnilu pingaarutilerujussuartut. ATASSUT-ip taamaalilluni kultureqarnikkut politikkimi meeqqanut, inuusuttunut inersimasunullu kalaallit filmiliaasa pitsaasut tunisassiarineqartarnissaat suliassatut pingaaruteqartut isigaa.

ATASSUT-ip taamaattumik Kalaallit Nunaanni filmiliornermut killiliussassat pitsaanerpaat pilersinneqarnissaat siunertaqarluartumik sulissutigerusuppaa, taamaalilluni tunisassiornermi atukkat pikkorissuteqartumik unammillersinnaasumillu piorsarneqarsinnaammata. ATASSUT-ip qularutiginnigilaa filmiliornermik suliaqarfik aammattaaq inuussutissarsiornikkut periarfissaasinnaammat ilimanaatilik.

#### Eqqumiitsuliornermut kultureqarnermullu tapiissutit

ATASSUT-ip kultureqarnermut politikkiani pingaarnerusutigut tunngaviuvoq kultureqarnermut tapiissutit amerlanerusumik assigiinngisitaartuunissaat qulakkeerneqassasoq. Kulturi niuernermi piumasaqaatinik attassisinnaasoq pisortanit tapiissutinik pisariaqartitsinngilaq. Akerlianilli eqqumiitsuliorneq taamaanngilaq, niuernermi piumasaqaatinik attassisinnaannginnami, taamaattorli pingaaruteqarluni naleqarluarlunilu.

Taamaattumik pisorta eqqumiitsuliornermut kulturikkullu tapiissutinik pisariaqartitsineq erseqqippoq. Pingaartuuvorli eqqumiitsuliornermi kiffaanngissuseqarneq nammineersinnaanerlu ataqqissallugit nalunneqigatsigu. Kultureqarnermi politikki, kultureqarnermi politikkip qiimmassarneqarnissaanut tamanna pissutaaqataanersoq uuttortarneqassaaq, tamannalu kinguneqassalluni kalaallit inuiaqatigiit inuiaqatigiittut pisuunerulernerannik.

#### Tusagassiuutit



Isummanik naqisimaneqanngitsumik pilersitsisinnaaneq aammalu nutaarsiassalerineq inuinnaat naalakkersuineranni pingaaruteqarput. Tusagassiuutit naqitat qarasaasiakkoortullu naqisimaneqanngitsuunissaat pisortanillu immikkoortuunissaat qulakkeerneqassaaq. Teknologiiip iluani killiliussatigut radiumik, TV-mik qarasaasiakkullu tusagassiuutinik namminersortumik pilersitsinissaq naqisimaneqanngitsumik pisariaqarpoq.

Oqaatsit patajaallisarneqarnissaannut atatillugu pingaartuuvoq inuiaqatigiinni marluinnik oqaaseqarfiusumiinnerput qiviassallugu. ATASSUT-mut pingaaruteqarpoq nunatsinni innuttaaqataasut tamarmik radiumi TV-milu nutaasissalerinermik pissarsissappata, namminneq inuiaqatiminni pisunik malinnaasinnaannorlugit. Taamaattumik kissaatigaarput oqaaseqarfiusut marluk tamarmik qarasaasiakkut tusagassiuutini inuiaqatigiinnitsinni assigiiaartumik nutaarsiassalerisinnaanissaat.

ATASSUT-ip tusagassiuutit kiffaanngissuseqartut arlaannaannullu attuumassuteqanngitsut qulakkeerusuppai. Naqisimaneqanngitsumik arlaannaannullu atuumassuteqanngitsumik nutaarsiassalerineq taamaallaat inuiaqatigiinni ajornartorsiutinik piviusorsiorumik isornartorsiuerpaluttumillu nalilersuisinnaavoq. ATASSUT-ip taamaattumik naalakkersuineramik suliaqartut tusagassiuutinut siulersuisuni ilaasortaanerminnit tunuarnissaat sulissutiginiarpaa, pissutigalugu taakkua najuunnerat tusagassiuutit arlaannaannulluunniit attuumassuteqannginnissaat pillugu pasinerluinermut pissutaasinnaammata.

#### Timersorneq

ATASSUT-ip timersorneq peqatigiiffeqarnermik tunngavilik siuarsarusuppaa, tamatumani inuinnaat oqartussaaqataanerat, nammineq piumassuseqarneq ataatsimoornerlu tunngavigalugit. Taamaattumik ATASSUT-ip allaffissornermi akornutaasinnaasut piarusuppai, taamaalilluni peqatigiiffiit ingerlanerat oqinnerulersinneqassammat.

Kalaallit Nunaanni timersortartut pikkorinnersiukkat periarfissaat nunani tamalaani atuuttussannorlugit patajaallisarneqassapput. Timersortartut pikkorinnersiukkat ileqqorissaarnikkut, inuttut atukkatigut aammalu inuiaqatigiussuserme isumannaatsumik ineriartortinnerisigut Team Greenlandip nammineq piumassutsiminnik kattuffeqarfiit peqatigalugit timersortat pikkorinnersiukkat atugaasa pitsaanerpaanngortinnissaat qulakkeerneqassaaq.

Illoqarfiit tamangajammik inersuarnik timersortarfeqarput, ukiukkulli timersornermi inissat illoqarfinni amerlanerpaani pitsaanngippallaarput. Siullermik uagut sisorarnermik soqutigisalittavut, aammattaarli ukiukkut takornariartitsisarnerup siuarsarneqarnissaa eqqarsaatigalugit illoqarfiit eqqaanni majuartaatit illernillu pilersinneqarnissaat sulissutiginiarpai.

Inuiaqatigiit peqqinnerulersinniarlugit timersornermi peqqinnissamut tunngasortaa sammeneqassaaq. Pingaartumik timersorneq peqatigiiffeqarnermik tunngavilik aammalu ilinniartitaanermi timersorneq, pingaartumik meeqqat atuarfianni, patajaallisarneqassaaq.

#### Isiginnaartitsineq

ATASSUT-ip nalunngilaa nunatsinni isiginnaartitsisartut amerlasuut isiginnaartitsineq pillugu inatsimmik amigaateqarmata. ATASSUT-ip Kalaallit Nunaanni isiginnaartitsisartut kattuffiat

suleqatigalugu isiginnaartitsineq pillugu inatsisip kalaallinut inuiaqatigiinnut naleqqussakkap suliarinissaa aqqutissiuukkusuppa.

ATASSUT-ip takorluugaa tassaavoq piffissaq ungasinnerusoq eqqarsaatigalugu nunatsinnut tamarmut isiginnaartitsisarfik pilersinneqassasoq, isiginnaartitsisartutut ilinniarsimasunut iluaqutaasussatut inissalik tamatumalu peqatigisaanik isiginnaartitsinermik inuussutissarsiutip iluani inunnik ilinniartitsiviususaaq.

ATASSUT-ip taamaalilluni kissaatigaa isiginnaartitsisarnermik neqeroorut tamatigoortoq aammalu pitsaalluinnartumik pitsaassusilik qulakkeerneqassasoq tamatumalu peqatigisaanik innuttaasut aammalu tikeraat avataaneersut misigisaqartinnissaannut aammalu oqalualaanik oqaluttuanillu kalaallit kulturikkut kingornussarsiaannik ilisimasassanik isumaginnittusaaq.

Ilageeqarnermut politikki

ATASSUT-ip inuit ataasiakkaat kiffaanngissuseqarnerat aammalu qanoq upperisaqarnissami kiffaanngissuseqarneq sukkulluunniit illersorneqassasoq erseqqissarpaa. Inatsisini tunngaviusuni § 4-mi aalajangersarneqarpoq danskit ilagiit tassaasut iivangiiliumik lutherikkuussusermillu tunngavillit taamalu naalagaaffimmit inatsiseqartitaasut. Ilagiit taamaalillutik inuiaqatigiussutsitsinni ilagiinni upperisarsiornermi sammivinnut allanut naleqqiullutik immikkut inissisimapput, tamannalu ATASSUT-ip ataqqivaa.

Kalaallit Nunaanni oqaluttuarisaanikkut ineriartornermi Guutip oqaasiisa oqaluffimmi nalunaajaatiginerat inuiaqatigiinnut anersaakkut nukittorsarneqarnermik, ataatsimornermik toqqissisimanermillu kinguneqarsimavoq.

Kalaallit Nunaanni inatsisiliortut pisussaaffigaat qallikkut torersuunissaaq aammalu isumagissallugu oqaluffeqarnissaa palaseqarnissaalu. ATASSUT-ip qitiusumik inissap taassuma ilagiit atatiinnarneqarnissaanni nukittorsarneqarnissaannilu pigiinnarneqarnissaa sulissutigerusuppa. Aammattaaq ilagiinni sulisut ilinniarnissaminnut ilinniaqqinnissaminnullu periarfissaasa pitsanngorsarnissaat ATASSUT-ip sulissutigerusuttuarpaa.

ATASSUT-ip ilagiit ataatsimoornerat ataqqivaa, aammattaarli tamatumunnga peqatigitillugu ilagiit sinniisaasa inunnit qinikkat ilageeqarfimmini sapinngisamik annertuumik sunniuteqaqataanissaat pingaartipparput.

Ilinniartitaanermut politikki

Ilinniartitaaneq pitsaasoq ilinniartitaanernut ingelaqqiffiusunut tulluurtumik ikaarsaariarfilik, inuit ataasiakkaat pisariaqartitaat kiisalu inuiaqatigiit pisariaqartitaat tunngavigalugit, tassaaginnanngilaq inunnut ataasiakkaanut inuttut pisinnaatitaaffiusoq, aammattaarli inuiaqatigiit kikkulluunniit ineriartornissaannut tunngavissatut pingaarutilik.

Ilinniartitseriaatsitta kiisalu tamatuma imassaata piorsarnerat tassaavoq tunngavissaaq inuit ataasiakkaat siunissaannik qulakkeerisusaaq minnerunngitsumillu nunatsinni suliat pingaaruteqartut nammineerluta suliarisinnaaneranun periarfissaasoq. Taamaattumik ATASSUT-ip kissaatigaa ilinniartitaanermut politikki sallerpaatinneqassasoq aammalu ilinniartitseriaatsimut pitsaasumut siumullu isigisumut naammattunik sillimmateqarfiusussoq qulakkiissallugu.

Pisortat suliassaraat inuuttaasut tamarmik ilinniarnissaminnut naligiimmik periarfissaqanissaat, taakkua piumasuseqarfigalugillu piginnaasaqarfigisaannik, ATASSUT-illu sukkuilluunniit innuttaasut ataasiakkaat ilinniarnissamik aammalu ilinniarfissamik kiffaangissuseqarlutik toqqaasinnaanissaasa siuarsarnissaat sulissutigumavaa. Ilinniagaqartut taakkua nunami maani imaluunniit nunami allami ilinniartitaanissamik namminneerlutik toqqarnissaannut kiffaangissuseqartariaqarput. Inuusuttortatta unammilligassanik taamaattunik tigusinissaannut kajumissaartariaqarpavut.

Tamatuma peqatigisaanik Kalaallit Nunaanni ilinniartitsiviit pitsaanerpaamik iluaqutiginiarneqassapput, aammalu uagut inuusuttut sapinngisamik amerlasuut sunilluunniit ilinniarnissaannut taakkununnga suliffeqalersitsisinnaasunik tunisariaqarpavut. Inuiaqatigiit ilinniarnissamut pikkorissarnissamullu periarfissaqarnissaa isumagissavaat.

Anguniagaq tassaavoq ilinniartitaanerup pitsaassusissaata qulakkeernissaa. Ukiut inuuffigaavut teknologiikkut periarfissat allanngoriartuinnarnerat peqatigalugu sukkasuumik ineriartortuarfusut. Ullumikkut suulluunniit nutaajugunik nutaaliaagunilluunniit amerlaqisutigut aqagu pisoqalillutillu nutaaliaajunnaassapput. Tamatumani atortut kisiisa pinngilavut, aammattaarli ilinniartitaanikkut neqeroorutit qanoq imaqarnissaat. Taamaattumik pisariaqarluinnarpoq ilinniagaqartut ilinniartitaanerup toqqarsimasamik iluani piukkunnarsarnissaminnut periarfissaqartuarnissaat.

ATASSUT-mut taamatulli pingaaruteqartigaaq ilinniartitaanermut politikki tullerriaarinermi pingaarnertut inississallugu, taamatullu pingaartigaluni ilinniartitseriaaseq tamarmi aaqqissuussaaneermigut alaatsinaanneqarpat. Tamatumani ilinniagaqartut ilinniartitaanernut toqqarsimasaminnut atatillugu toqqarsimasamik namminerminnut siunissaminnullu qanoq iluaqutaatiginissaa pillugu uuttuinissaminnut sakkusaqartariaqarput, tamannalu Kalaallit Nunaanni inatsisiliortut ilinniartitaanerup iluani aalajangiinissaannut tunngavissanut sakkusaqarnissaannik qulakkeerissalluni.

Meeqqat atuarfiat

Atuarfitsialak ilinniartitseriaatsimi tunngaviulluinnarpoq, aammalu pinngitsoorani ilinniarfissaalluni. Tamanna meeqqat ataasiakkaat pikkorissusiisa sapinngisamik pitsaanerpaamik ineriartortinnissaannut qulakkeerissaq.

Angajoqqaat timitalimmik peqataanissaat aalajangiisuvoq pingaarutilik, meeqqat ataasiakkaat kingornamut inuunermi unammilligassat suliarinissaannut sakkussinneqassappata. Taamaattumik angajoqqaat meeqqamik tunngaviusumik atuarfimmi atuartitaanissaanni tunngavissat pingaarutillit qanoq ittumik ilusilersornissaannut pisinnaaffeqarnissaat patajaallisarneqassaaq.

ATASSUT-ip pingaartippaa meeqqat atuarfianni inatsisiliornikkut killiliussat tamanut atuutumik iluaqutiginenqarnissaat suliutigut piumasaqaatit patajaallisarnissaanni, oqaatsinik atuartitsinerup pitsannorsarnissaani, aammalu atuartitsineq meeqqat ataasiakkaat pisariaqartitaat tunngaviglaugit assigiinngisitaarlugu, taamaalilluni taakkununnga tamanut unammilligassat qulakkeerneqassammata.

Ukiuni qulingiluani pinngitsoorani atuartussaataaneq ingerlaqqissaq, tamatumani atuartut tamarmik tunngaviusumik pikkoriffigisassanut piukkunnarsarnissaat qulakkeerneqassammat, ilaatigut ilinniagassatigut aammalu inuttut.

ATASSUT-ip pingaartippaa inuiaqatigiinnut tunngasunik atuartitsinerup sapinngisamik piaartumik aallartinnissaa. Meeqqat inuunerminni piaartumik ilikkartariaqarpaat inatsisit sukkulluunniit atuuttut naapertorlugit suna eqqortuunersoq eqqortuunnginnersorluunniit. Meeqqat atuarfianni perorsaasutut sulineq taamaalilluni meeqqat atuakkatigut piginnaasaannik kajumissaarinermut, nammineerusunnerannut kiisalu eqqortussarsiorsinnaanerannut iluaqutaassaaq.

Atuarfitalak aallaaviuvoq pitsaasoq. Taassuma Kalaallit Nunaanni meeqqat atuarfiata pitsaassuseqartumik ineriartornissaa qulakkiissavaa. Tamatumunnga naatsorsuutigeqqaagassat assut pingaaruteqartut arlaqarput:

Ilinniartitsisut sulisuusinnaasut pitsaanerpaajussapput perorsaanermit ilinniartitsinermitu piumasaaqatinik naammassinnissinnaasut.

Atuartitsinermit atortut nutaaliaassapput ullutsinnullu naleqquttuussallutik.

Meeqqat atuarfianni sulisut sukkulluunniit ilinniartitseriaaseq nutaaliaasoq naammassisinnaasariaqarpaat.

Angajoqqaat pingaartillugit anguniakkat naammassineqarnissaannut timalimmik isumalluutaasariaqarput.

ATASSUT-ip naatsorsuutigeqqaagassatut taaneqartut meeqqat atuarfianni atugaanissaat sukkulluunniit sulissutigiumavaa. Anguniagaq tassaavoq meeqqat, inuusuttuaqqat, angajoqqaat, ilinniartitsisut aammalu atuarfiit tamaasa ataatsimut eqqarsaatigalugit sukkulluunniit meeqqat inuusuttuaqqallu atuarnissaannut toqqissisimasunik killiliussaqaassasoq.

Meeqqat atuarfianni atuartitsinermit tunngavissat tassaassapput kalaallisut oqaatsivut kulturerpullu. Tamatumali peqatigisaanik nunarsuarmioqataasutut uagut namminneq kinaassuseqarnitta naggueqarnittalu piginnarnissaanni allamiut oqaasiisa atuartitsissutiginerat patajaallisassavarput. Taamaattumik ATASSUT-ip kissaatigaa tuluit oqaasiisa, spaniamiut oqaasiisa, tyskillu oqaasiisa atuartitsissutiginerat pinngitsoorani 4. klassemitt aallartittassasut franskillu oqaasii 9. klassemiit neqeroorutigineqartassasut.

Piffissaq aallartiffiusoq tamatigoortoq

Meeqqat meeraqatiminnut ukioqatiminnut naleqqiullutik ilisimasamikkut siuarsimasut piaarnerusumik atualersinnaasariaqarput. Meeraqarpoq mikisunik nalinginnaasumik sulerusuttorujussuarnik ilinniartikkuminartorujussuarnillu. Taamaattumik meeqqat ineriaarsimasut ullumikkorninngarnit pitsaanerusunik periarfissittariaqarpavut.

Meeqqanik immikkut atuartitanik sulineq aammalu immikkut alaatsinaaffiususaaq attatiinnartariaqarpoq patajaallisarneqarlunilu.

Anguniagaq unaasariaqarpoq atuarfiup, ilinniartitsisut angajoqqaallu qanimut suleqatigiinnermikkut meeqqat iluaqutissaat pisariaqartitaallu paaqqutarissappatigik. Periarfissat marluusut iluatsinnissaannut naatsorsuutigeqqaagassaavoq angajoqqaat atuarfiullu qanimut suleqatigiinnermikkut nalilissappassuk meeraq piukkunnarnersoq aammalu meeqqap

siusinnerusukkut, kingusinnerusukkut imaluunniit ukioq ataaseq atuaqqinnissani ajoqutigissannginneraa.

Allami atuarluni najugaqarneq

Inuusuttuaqqaat nunaqarfinni isorliunerusunilu najugallit siunissami toqqissisimallutik illoqarfinni anginerusuni atuarlutik najugaqarnissaat ATASSUT-ip sulissutigiumavaa. Tamatumunnga atatillugu ilinniartunut inissiat ilaqutariillu najugaqarfissat naleqquttuusariaqarput.

ATASSUT-ip aammattaaq sulissutiniarpaa siunissami angajoqqaat neqeroorfigineqartassappata, taamaalillutik meeqqat Danmarkimut nunanulluunniit allanut atuariartorsinnaassallutik. Tamanna aaqqissuullugaassaaq siunertaqarluarlunilu, taamaalillutik angajoqqaat – taamatut aalajangersimagunik – meeqqatik toqqissisimallutik taamatut atuariartortittarsinnaammatigik.

Oqaatsit

ATASSUT-ip ilinniartitseriaaseq imaalillugu ineriartortikkusuppaa sunik saqqummiussaqaarsinnaanermut inissalerlugu. Eqqarsaatigineqassapput inuiaqatigiussutsitsinni ikinnerussuteqartorpasuit danskit oqaasiinik inunnguuseralugu oqaaseqartut. Taamatutaaq inuit nunanit allaniit tikittartut eqqarsaatigineqartariaqarput. Taamaattumik ATASSUT-ip qulakkeerusuppa oqaaseqatigiit tamarmik ilinniartitaanissamik neqeroorfigineqassappata, taakkua inunnguuseralugu oqaasii aammalu nunanut tamalaanut nallersuussinnaassuseq eqqarsaatigalugit.

ATASSUT isumaqarpoq pingaartorujussuusoq meeqqat inuusuttuaqqallu kalaallisut danskisullu atuarnerup saniatigut tuluit allamiullu oqaasii ilinniassappatigik. Siunissami qaffasinnerusumik ilinniartitaanerit ingerlanniassagaanni allamiut oqaasiisa ilinniarnissaat pisariaqarnerujartuinnassaaq. Taamatutaaq tamanna suleqatigiinnermut, inooqataanermut aammalu nunanik allanik niueqateqarnermut iluaqutaassaaq.

Innuttaasuni inersimasut eqqarsaatigalugit innuttaasuni kalaallisut oqaasillit nunami allamiut oqaasiinik ilinniarnissaminnut periarfissineqartariaqarput. Inersimasunik atuartitsineq aqutissatsialaavoq aammalu eqiasuitsumik atorluarneqartariaqarluni.

Ilinniarnertuunngorniarnermik ilinniartitaanerit

ATASSUT-ip ilinniarnertuunngorniarnernit qitiusumik maannakkut inissisimanagerat pigiinnarneqassasoq kissaatigaa, tamatumalu peqatigisaanik ilinniartitaanerni ilinniagassanilu pitsaassuseq patajaallisarneqassasoq. ATASSUT-ip aaqqissuussaaneq tamatigoortoq qulakkeerusuppa, taamaalilluni ilinniarnernep ingerlannera inuit ataasiakkaat pisariaqartitaannut pitsaanagerusumik naleqqussarneqassammat.

Suliatigut pikkorissuunissaq aammalu ilinniarnertuunngorniarnifimmi atuartitaanerni tamani atuagassat akornanni ikioqatigiinnissaq pingaartinneqassaaq. Ilinniarnertuunngorniarnifup nalinginnaasup aammalu inuussutissarsiutitigut ilinniartitaanerit ataatsimut aaqqissuunneqarnissaat atulersinneqartariaqarpoq.

Inuusuttunik ilinniartitaanerit inuusuttuaqqaat nalinginnaasumik pilersitsisinnaanerisa ilisimasassaasalu patajaallisarnissaannut periarfissaqarnissamik imaqqassapput. Taakkua

ilinniarnertuunngorniarluni atuartitaanerni avissaartinneqarsinnaanatillu avissaartinneqassanngillat. Ileqquuvoq nalinginnaasumik pilersitsisinnaaneq atuartitsissutigineqarnermini tassaanerummat pinngortitamut inuiaqatigiinnullu tunngasunik ilinniarneq. Taakkununga marluusunut periarfissat aalajangiusimaneqaannarlutillu itisilerneqassapput. Kisiannili pingaaruteqarpoq siunissami inuit oqartussaaffeqarneranni aalajangiisarnerni innuttaasut pinngortitalerinemik ilisimatusarnermut teknikkikkullu ineriartornermut paasisaqarnerulerpata. Taamaattumik taamatut sammiveqarneq ilinniarnertuunngorniarluni atuartitaanerni nalinginnaasumik pilersitsisinnaanermi nukittunerusumik inissisimassaaq.

Ingerlaqqiffiusumik ilinniartitaanerit

ATASSUT-ip qularutiginnigilaa kalaallit inuiaqatigiit pissarsilluaatiginerussagaat ilinniagaqartortamik namminneerlutik Kalaallit Nunaanni nunamiluunniit allami ilinniarusunnerlutik aalajangersinnaassappassuk. Taamaattumik qulakkeerneqartariaqarpoq ilinniagaqartut piviusorsiorlumik toqqaanissaminnut periarfissaqarpata.

ATASSUT-ip taamaattumik nunatsinni ilinniartitsiviit suliamikkut ineriartortitsivigisinnaasaminnik qulakkerivigineqarnissaat sulissutigerusuppaa, tamatumalu peqatigisaanik danskit nunanilu allani ilinniartitsinerimik suliaqarfiit ingerlaavartumik isumaqatigiissuteqarfigineqartassappata. Tamakkua tamarmik suliassanik annertuunik qulakkeerissapput, kiisalu ilinniagaqartut ilinniarfimminni qanoq atugaqarnissaannik tunineqassallutik.

Inuussutissarsiutitigut ilinniartitaanerit

Kalaallit Nunaanni inuussutissarsiutitigut ilinniartitaanerit pitsaasut pilersissinnaasimavavut, taakkua aalajangiusimaneqarlutillu ineriartortinneqassallutik. Inuussutissarsiutitigut ilinniartitaanerit ingerlannissaannut atugassarititat pitsaasuugaluartut taamaattoq naluneqanngilaq ilinniagaqartunut suliffimmik misiliilluni suliffissat pillugit ajornartorsiuteqarnerit pilersarmata. Taamaattumik pingaartuuvoq ilinniagaqartut misililluni suliffissanik amigaateqarnertik pissutigalugu taamaatiinnannginnissaat kippunnagu sulissutigineqassappat. Tamanna aaqqissuussaanerup alaatsinaanneratigut pissaaq, tamatumani pingaartumik suliffeqarnermi sulisut ilinniarsimasut pisariaqartitaanerata nassuiarneratigut, piffissaq qaninnerusoq ungasinnerusorlu eqqarsaatigalugu. Suliaq aammattaaq Kalaallit Nunaanni sulisunik qanimut oqaloqatigiittarnikkut suleqatigiinnikkullu pissaaq.

Sulisunik ilinniartitsinerit

ATASSUT-ip sukkulluunniit Kalaallit Nunaanni suliffeqarnermi sulisut pikkorissuseqartut pissarsiarineqarsinnaanerat sulissutiginiarpaa. Aammattaaq teknologiikkut ineriartorneq peqatigalugu sulisinnaasut ingerlaavartumik piukkunnarsarnerat pisariaqarpoq.

ATASSUT-ip taamaalilluni pisortat sulisunik ilinniartitsinissanut neqaeroorutaasa avataatigut atugassarititanut killiliussat oqilisaassinerillug pitsaasut qulakkeerneqarnissaat sukkulluunniit sulissutigerusuppaa, taamaalilluni sulisitsisut sulisullu sulisunik ilinniartitaanerit siumut naatsorsuutigereersinnaammatigik.

Inersimasunik ilinniartitsinerit ilinniartitseqqinnerillu

ATASSUT-ip inuit ataasiakkaat namminneerlutik ilinniaqqinnissaminnut akisussaanerat pingaartippaa, aammattaaq inersimasunik ilinniartitsinerit ilinniartitseqqinnerillu eqqarsaatigalugit.

Inersimasut maannakkut sulisinnasut pikkorissarnissaannik pisariaqartitsineq paasillugu inersimasunik ilinniartitsinerit ilinniartitseqqinnerillu piujuaannarneranni ATASSUT-ip sukkulluunniit sulissutiginiarpaa, qulakkiissallugu namminersortumik pikkorissartitsinermik neqerooruteqartussat, pisortani sullissiveqarfiit, højskolit il.il. inersimasunik ilinniartitsinernik ilinniartitseqqinnerillu neqerooruteqarnissaminnut oqilisaassivigineqartunik atugaqarnissaat, taamaalillutik inersimasunik ilinniartitsinerit ilinniartitseqqinnerillu qanoq piumaneqartiginerat naapertorlugu aqunneqarsinnaassammata.

Innuttaasunut kalaallisuinnaq oqaasilinnut ilinniartitsineq

Ilinniagaqarnissamut sapinngisamik oqaatsit akornutaasariaqanngillat. Nassuerutigalugu nunatsinni innuttaasut kalaallisuinnaq oqaasillit piujuassammata, ATASSUT-ip innuttaasuni taakkua ilinniartitaanernik piginnaanngorsarfiusunik neqeroorfigineqartarnissaat sulissutiginiarpaa.

Teknologii nunanilu tamalaani oqalliffik

Assartuinerup telemilu attaveqaateqarnerup iluani allanngornerup kinguneraa qaammataasat aqutigalugit nunarsuarmi suminngaanniilluunniit paasissutissanik tiguisinnaagatta, issariarnermi tassani pisimasoq pippat.

Taamatut ineriartorneq nalunngilarput. Taamaattumik ilinniartitseriaaserput imatut aaqquissuuttariaqarparput unammilligassaq taanna annertoq sukkulluunniit akuersaarsinnaassallugu. Taamaattumik ATASSUT-ip ilinniartitsiviit sapinngisamik pitsaanerpaanik atortoqarnissaat, nunanut tamalaanut attaveqariartuinnarnitsinni piumasaqaatinik periarfissanillu naammassisaqarsinnaasunik.

ATASSUT-ip nunani tamalaani pissutsinik ilisimasatta annertuumik pitsanngorsarnissaat pingaartuusoraa. Nunani tamalaani pissutsinik ilisimasaqarnerunermi aaqqiagiinngissutit pinaveersaartinneqassapput, tamatumalu peqatigisaanik tunisassiatta avammut tuniniarneqarneranni nukittunerussaagut aammalu nunanik tamalaanik Kalaallit Nunaata aamma ataveqarfiinik annerpaamik iluaquteqarluta.

Ilinniarnermi tapiissutit

Kikkulluunniit aningaasatigut qanoq tunulequtaqarnertik apeqqutaatinnagu ilinniarsinnaanerit qulakkiissagaanni Namminersornerullutik Oqartussat ilinniagaqartunut ataasiakkaanut ilinniarnermi tapiissutinik akiliisariaqarput. Ilinniarnermi tapiissutini siunertaavoq ilinniarneq ingerlanniaraanni aningaasaqarnikkut tamanna sapernassanani.

Ilinniagaqartut tamarmik kalaallinit inuiaqatigiinnit ilinniarnerminni tapiissutisisartut ilinniarnermik nalaanni Kalaallit Nunaanni ilinniareernermikkut

suliffissaasinnaasut pillugit ingerlaavartumik ilisimasaqartariaqarput.

Ilinniaqqammersut ilinniareernerikkut imaaliillaannaq suliffissarsinissaminnut periarfissaqanngitsut sapinngisamik ingerlaqqiffiusumik ilinniarnissaminnut imaluunniit suliamut tunngasumik pikkorissarnissaminnut neqeroorfigineqarsinnaasariaqarput. Tamatumunnga ilinniarnermi tapiissutit pineqarsinnaasariaqarput.

Sulisoqarnermut politikki

ATASSUT-ip Kalaallit Nunaanni sulisoqarnerup patajaallisarneqarnissaa sulissutigaa. Suliffeqarnermut aammalu ilinniartitsinerup immikkoortortaarfimmuut ataatsimut pingaaruteqartut tassaapput unammilligassat teknologiikkut ineriartorerup periarfissiissutai.

Taamaattumik pingaaruteqarluinnarpoq sulisinnaasut qaffasissumik ilinniartitaanissaat qulakkiissallugu. ATASSUT-ip kalaallini oqartussaasut sulisut aammalu sulisitsisut kattuffii peqatigalugit ataatsimoorlutik innuttaasuni sulisut/suliffissaaleqisut ilinniarnissaannut periarfissat qulakkiissagaat sulissutiginiarpaa.

Aammattaaq sukkulluunniit sulisoqarnermi aqqissuussaanerup alaatsinaaneqarnissaa erseqqissuusariaqarpoq, tamannalu pisariaqarluni ilinniartitaanermut immikkoortortaarfip aqqissuussaanerata tamatumunnga peqatigitillugu alaatsinaanneqarneratigut.

Suliffissaaleqisut sulilersinneqarnissaat

Sulineq sukkulluunniit akilersinnaasuusariaqarpoq. Taamaattumik suliffissaaleqisut sapinngisamik suliffinnik suliffeqarfiit sulisussaartinnigisaannik pissarsisariaqarput. Tamatumunnga peqatigitillugu qulakkeerneqassaaq sulilersitsiniarnermut pilersaarutit suliffeqarnermi naleqqussaanermik nalinginnaasumik ajornerulersitsissanngitsut.

Suliffissaaleqisut ataasiakkaat Namminersorerullutik Oqartussat KANUKOKA-llu suleqatigiillutik sulilersitsiniarnermut immikkoortoq ataatsimoorlutik pilersitartik suleqatigalugu, pineqartup sulilersitsiniarluni pilersaarummut ilanngunneqarnissaa ataavartumik sulissutigisariaqarpaat.

Suliffissaarunnissamut sillimmasiisarfik

ATASSUT-ip sulisoqarnermi illuatungeriit kajumissaarniarpai siunissami nuna tamakkerlugu, kikkunnulluunniit attuumassuteqanngitsumik aammalu suliat apeqqutaatinnagit suliffissaarunnissamut sillimmasiisarfik pilersinneqassasoq, kalaallini inuiaqatigiinni sulineramik inuussutissarsiuteqartunut tamanut ammasoq.

Taamaattorli tamatumunnga peqatigitillugu qulakkeerneqassaaq pisortatigut isertitat nuunneqartarnissaat, suliffissarsinnaanngitsut imaluunniit arlaatigut imminnut pilersorsinnaanngitsut isornaatsumik inuunermikkut atugaqarnissaat qulakkeerniarlugu.

Suliffimmi atukkat

ATASSUT-ip kalaallinut inuiaqatigiinnut sullivinni atukkanik suliassaarfimmuut akisussaaffik nunatsinnut nuunniarpaa. Kisiannili tamatumani naatsorsuutigeqqaagassaq pingaarutilerujussuaq tassaavoq inatsisiliornermut tunngasortaasa iluamik isumannaatsumillu suliarineqarnissaat.



Sulisitsisunut, sulisunut pisortanilu oqartussaasunut pinngitsoorani suliassaavoq Kalaallit Nunaanni suliffeqarfinni suliffimmi atukkat pitsaasut sulissutigineqarnissaat.

Kalaallit Nunaanni suliffeqarfinnut suliffimmi atukkanut maleruagassat erseqqissut pigineqassapput. Suliffeqarfiit suliassaq pimoorutinngippassuk tamanna kinguneqartussaavoq. Ilisimasakinneq ajornartorsiutaappat, taava suliffeqarfik suliamut tunngasumik siunnersorneqaqqullugu peqquneqassaaq. Piumassuseqannginneq ajornartorsiutaappat taava nerrivik tilluttarneqassaaq.

Suliffimmi atukanut pitsaasunut suliniuteqarneq suliffeqarfinni ingerlalluakkami sumiluunniit aqutsinermik suliassammut pinngitsoorani ilanngunneqartariaqarpoq. Tamatuma peqatigisaanik pisortat suliniutaanni suliassaqarfiit suliffinni atukkanik kingunerlutsitsiffiusinnaasut sammineqassapput. Assersuutigalugu ajutoornerit sulisillunilu ajoqusernerit annertuut pinaveersaartinnerisigut.

Sulineramik inuussutissarsiuteqartumut ajutoornermik nalaataqartumut aammattaq iluameersumik sillimmasiisoqartassaaq. ATASSUT-ip sulisilluni ajutoorneq pillugu suliassap allanngortinnissaa sulissutiginiarpaa, suliamik ingerlatsinermik sivikinnerulersitsisusaaq aammalu sulisilluni ajutoornerni taarsiivigitinnissamut pitsaaneruseqarneq pineqarsinnaasoq.

Naartunermi erninermilu sulinngiffeqarneq

Pingaartuuvoq aatsaat siullermik angajoqqaanngortut erninerup kingornatigut piffissami siullermi meeqqaminnut piffissaqarnissaat.

ATASSUT-ip naartunermi erninermilu sulinngiffeqartarnerup sivitsorneqarnissaa sulissutiginiarpaa suliffeqarnerup iluani illuatungeriit tamarmik akornanni isumaqatigiissuteqartarnernut peqatigitillugu. Tamatumani qulakkeerneqassaaq ilaqutariit ataasiakkaat naartunermi erninermilu eqaatsumik sulinngiffeqarnissaat, anaanaasup ataataasullu akornanni sulinngiffeqarnerup agguataarnissaa eqqarsaatigalugu, aammattaarlu sulinngiffeqarnerup erseqqinneruseqarneq aqqissuunneqarnissaa eqqarsaatigalugu.

Sulinngiffeqarneq imaalillugu inissinneqarsinnaassaaq, angajoqqaat tamarmik ataatsikkut sulinngiffeqarlutik, imaluunniit taassuma ilaa kingusinneruseqarneq kinguartinneqarsinnaalluni imaluunniit sulinngiffinnut arlalinnut sivikitsunnguakkuutaartutut ilusilerlugu.

Assigiimmik akissarsiaqarnissaq

ATASSUT-ip inunnik assersuutigalugu arnaaneq angutaanerluunniit, inuiannit sorlernit kingoqqisuuneq, atoqatigiittarneq qanoq isumaqarneq imaluunniit naalakkersuinnikkut inissisimaffik pissutigalugu assigiinngisitsisoqarnissaa akerleraa. Kikkut tamarmik inuttut suliniutimikkut naliliivigineqassapput aammalu suliaq ilinniartitaanerlu aqutugalugit periarfissanik ujarlertariaqarlutik, aammalu kikkut tamarmik suliamut assigiimmik assigiimmik akissarsiaqassallutik.

Inuussutissarsiornermut politikki

ATASSUT isumaqarpoq inuiaqatigiinni siuariartornissamut naqisimaneqanngitsumik niuerfimmik pilersitsinissaq aammalu naqisimaneqanngitsumik unammilleqatigiinnissaq naatsorsuutigeqqaartariaqartut. Kalaallit Nunaanni inuussutissarsiuteqartut tassaapput aningaasaqarnermut pitsaasumut aalajaatsumillu ineriartortumut tunngavissanik pilersitsisussat, aammalu inuussutissarsiuteqartut pitsaasumik ingerlasut pingaarutilittut piumasaqaataallutik Kalaallit Nunaanni inuiaqatigiit pitsaanerpaamik atuunnissaannut.

Nunarsuarmi niuerfinni suliffeqarfinnilu annertusiartuinnartumik nunat killeqarfii apequtaajunnaariartortillugit pingaartuuvoq Kalaallit Nunaanni inuussutissarsiuteqartut nunani tamalaani niuernermi peqataanissaminnut periarfissaqarpata aammalu suliaasaqarfinnik piukkunnartunik, sulisoqarnikkut niuernikkullu iluatinnaateqartunik immikkut sammisaqarlutik.

Tamanna tunngavigalugu ATASSUT-ip pisortani immikkoortortaqaarfik piviusorsiortoq sulissutiginiarpaa namminersortumik inuussutissarsiuteqartunut killiliussanik pitsaasunik qulakkeerisussaq. ATASSUT-ip aammattaq sulisinnaasut piukkunnaateqarluartut suliffeqarfinnit pissarsiarineqarsinnaanerat sulissutiginiarpaa.

Suliffinnik aallartitsiniarnermi kulturi patajaallisarneqassaaq. ATASSUT-ip namminersorluni suliniuteqarneq aammalu atugassarititat unamminartut iluatinnaatillillu aqutugalugit inuit Kalaallit Nunaanni inuiaqatigiinni suliffeqarfinnik nutaanik aallartitsinissaminnut aammalu suliffeqarfinnik nutaanik pilersitsinissaminnut sapiissuseqartut nersornaaserneqartarnissaat pingaartippaa.

Nunatsinni suliffeqarfinnik aallartitsiniarneq pilerinarnerusunnagortinniarlugu aammalu nunani allani aningaasaliisartut soqutiginnilersinniarlugit naatsorsuutigeqqaagassaavoq pingaarutilik, suliffinnik aallartitsiniartut aningaasaliisullu pisariaqanngitsumik aningaasatigut artukkerneqannginnissaat, taamaattumillu ATASSUT-ip maannamut suliffeqarfinnut ingerlatseqatigiiffinnullu akileraarusersuinerup suli annikillisinneqarnissaa sulissutigalugu.

Pisortat suliffeqarfiutaat sukkanerusumik namminersortunit ingerlatassanngortinneqartariaqarput. Namminersornerullutik Oqartussat imaluunniit pisortani oqartussaasut allat niuernermik ingerlatsissanngillat – namminersortumik inuussutissarsiuteqartut tamanna suliaassaraat. ATASSUT-ip takorluugaa tassaavoq siunissami pisortat aamma inuussutissarsiuteqartut akornanni aningaasaqarnikkut pisuussaaffeqassanngitsoq. Taamaattumik ATASSUT-ip kissaatigaa piffissaq qaninnerusooq eqqarsaatigalugu pisortanit tapiissutit kiisalu pisortat aamma suliffeqarfiit akornanni kiffartuunneqarnissamik isumaqatigiissutit atorunnaarsinneqarnissaat.

Suliffeqarfinnut tapiissutit unammilleqatigiinnissamut equsoortitsisarput, sunniuteqarsinnaannginnermik annertusaallutik aammalu kukkusumik aningaasaliissuteqarnissaamut assorsuaq navianartorsiorititsinnaallutik. Pitsaaneruvoq suliffeqarfiit namminneerlutik sinneqartoorutitik piginnarsinnaappatigik tapiissutit peerneqarnerisigut aammalu taamaaqataanik akileraarutit annikillisinnerisigut.

Pisortat inissisimanerisa pitsaasumik namminersortutut inuussutissarsiuteqartut aqutissiutissavaat aammalu aningaasaleerusunnermik pilersitsillutik, aammattaq nunanit allanit. Tamanna piviusunnagortinniaaraanni pisortat inuussutissarsiuteqartullu akornanni qanimut oqaloqatigiittarneq pisariaqarpoq, inerneralu tassaassalluni Kalaallit Nunaanni tamarmi eqqummaarissumik ineriartortumillu inuussutissarsiuteqartut pilernerat, nunatsinni niuernermik imaluunniit avammut tunisassiornermik pilersuisunik.

Namminersortuunermi kulturi patajaallisarneqassaaq

Inatsisiliorneq aammalu malittarisassat tamarmik namminersortumik suliniuteqartunik namminersortuunissamullu qiimmassaataasariaqarput.

Nutarterinissamut suliffinnik aallartitsiniartut aallaaviussapput. Taakkua pisariaqartitanik nutaanik nassaarniassapput nutaamillu tunisassiorneq aallartillugu pisariaqartitat taakkua naammassiumallugit.

Taamaattumik namminersortumik suliffeqarfiup aallartinnissaanut ingerlannissaanullu atugassarititat pitsaanerusut pilersinneqassapput. Imaanngitsoq pisortanit tapiissuteqarnikkut, kisiannili akiliraarutit akitsuutillu annikillisinnerisigut kiisalu suliffeqarfimmik aallartitsinermut ingerlatsinermullu atasumik pappialarsorneq malittarisassatigullu aqutsineq pisariillisarlugit.

Ilinniartitseriaaseq annertuneroqisumik namminersortuunermi kulturimik sammisaqassaaq. Atuartitsissutissanik, atuartitsinermut atortunik aammalu ilinniartitsinermi periaatsinik toqqaanermi ilinniartitsivinnit atuartut ilinniagaqartullu nammineq suliniuteqarsinnaanermut aammalu namminersortumik pilersitsisinnaanermut sungiusarnissaat annertunerusumik periarfissinneqartariaqarpoq.

Piniartutut inuussutissarsiorneq

Piniartutut inuussutissarsiorneq kulturitsinnut pinngortitamullu atassuteqarnitsinnut tunngaviulluinnarpoq. Piniartutut inuussutissarsiorneq umiatsiaararsorluni aalisarnermik tapertaqartillugu inuiaqatigiit ilaannut inuussutissarsiummik tamatuminnga pingaartitsisunut pingaarnerpaatut inuussutissarsiutaajuassaaq.

ATASSUT-ip politikkia tassaavoq piniartut umiatsiaararsorlutillu aalisartut inuussutissarsiutiminnik ingerlatsinissaannut atugaasa ingerlaavartumik pitsaanerpaanngortinnissaat aammalu naleqqussarnissaat. ATASSUT-ip piniartut umiatsiaararsorlutillu aalisartut tunisassiaasa siullerpaamik inuiaqatigiinni maani najugaqartunut iluaqutaanissaat sulissutiginiarpaa. Tamanna pissaaq piniakkanit aalisakkanillu tunisassiat pingaartumik najukkani assigiinngitsuni nunatsinnilu tuniniarneqarnissaat siunertaralugit suliarineqartarata.

ATASSUT-ip najukkani assigiinngitsuni tunisassiorfiit/tunitsiviit ullumikkut pisortanit isumagineqartut namminersortunit ingerlatassanngortinniarpai. Najukkani assigiinngitsuni innuttaasut tunisassiamik ineriartortinneqarnissaannut periarfissanik pitsaanerpaamik tunineqartariaqarput.

ATASSUT-ip piniartutut inuussutissarsiornerup tunngavimmigut attatiinnarneqarnissaa annertusarneqarnissaalu kissaatigaa sumiiffinni piniagassaqarfiusuni tamanna ajornartinnagu. Soorunami ineriartorneq eqqarsaataannaasoq pilersissanngilarput. Tamanna piniartutut kulturitoqqatsinnut akerliussaaq.

Pilersitsiffiusinnaasunik eqqarsarnitsigut nunaqarfinni tunitsiviit immikkoortutut mikisunnguutut namminersortutut allanngortissinnaavavut nunatsinni tuniniaanermi tunisassianik pilerinartunik pilersuisinnaasutut, najukkani assigiinngitsuni tunisassianit suliarineqartunik. Taamatut

allanngortiterineq piniartunut, umiatsiaararsorlutik aalisartunut aalisariutinillu aalisartunut iluaqutaassaaq.

Saniatigooralugu piniartut/saniatigooralugu aalisartut

Kalaallit Nunaat piniarnikkut aalisarnikkullu kulturimik tunngaveqarpoq, taamaattumik saniatigooralugu piniartut saniatigooralugulu aalisartut suli amerlaqalutik. Kikkunnet tamanut inissaqartariaqarpoq taamaattumillu ATASSUT-ip aammattaaq inuiaqatigiinni taakkua eqqarsaatigiumallugit.

Naluneqanngilaq saniatigooralu piniartartut saniatigooralugulu aalisartartut pisaminnit saniatigut isertitassatik pinngitsoorsinnaanngikkaat. Taamaattumik ATASSUT-ip piniagassanik aalisakkanillu isumannaatsumik naapertuilluartumillu agguataarinissaq sulissutigiumavaa, taamaalilluni inuit taakkua eqqarsaatigineqassammata.

Aalisarnermik inuussutissarsiuteqarneq

ATASSUT-ip iluaqutaasumik avammut tuniniaalluni aammalu nunatsinni tuniniaalluni inuussutissarsiutigalugu aalisarneq pingaartittorujussuuaa. Siulliup nunat allat aningaasaannik isertitaqartarnissarput qulakkiissavaa aalisakkanillu tunisassiornermi aammalu inuussutissarsiutini kiffartuussivinni aqqusaarneqartussani sulisoqarnermik siuarsaassalluni. Aappaata nunatsinni tuniniaanerup pilersorneqarnera qulakkiissaava aammalu nunaqarfimmiut isertitassaminnut tunngavissaannik tunissallugit, nunaqarfiit ataannarnissaannik qulakkeerisumik.

Kissaatigaarput aalisarnermik inuussutissarsiuteqartut sapinngisamik pitsaanerpaanik atugassaqartissallugit ingerlaavartumik nutarterinissaannut naleqqussaanissaannullu, aalisakkatta nungusaataanngitsumik iluaqutigineqarneranni killissat iluanni.

Aalisarnermi teknologiikkut nutaaliaasukkut aammattaaq pingaaruteqarpoq aalisakkat nungutaannginnissaat, taamaattumillu pisariaqarluinnarpoq pisarineqarsinnaasut biologinit malittarisassaqartinneqarpata, sapinngisamik sivisuumik iluaqutaanissaat qulakkeerniarlugu. Aalisarnerup ingerlaqqilluni tulluurtumik ineriartornissaanut taamaalilluni aalisakkat pisassiissutissatigut nunani tamalaani pisassat pigiinnarnissaannut aalajangersimasumik isumaqatigiissutit pisariaqarput.

ATASSUT-ip sinerissamut qanittumi aalisariuteqarnermi angallatit aqqjissuussaanerisa naleqqussarnissaat sulissutigiumavaa. Aammalu ATASSUT-ip aalisarneq uummarissarniarlugu aalisakkat allat ullumikkut pingaartinneqanngitsut pingaartinniarpai.

ATASSUT-ip ilisimatusarnerup annertuumik pingaartitaanissaa pisariaqartutut isigaa, pissamaatit naluneqanngitsut nalunaarsornissaannut aammalu pissamaatit nutaat mannalu tikillugu iluaqutiginiarneqanngitsut iluaqutigineqarnissaannut. Aalisagaqassutsip aammalu qalerualinnik aalisagaqassutsip ingerlaavartumik ilisimatuussutsikkut misissuiffiguarnissaat kissaatigaarput. Misissuinerit uagut isumarput malillugu aalisarnermi kattuffiit aammalu aalisartut najukkanik ilisimaarinnittut suleqatigiinnerisigut pissapput. Misissuinerit ilisimatuunit alaatsinaanneqartut aammalu illersorneqartut pingaaruteqarput nungusaataanngitsumik aalisarnerup ingerlatiinnarnissaanut.

ATASSUT-ip anguniagaa tassaavoq aalisarnerup sapinngisamik annikinnerpaamik pisortanit tapiiffigineqartarnissaa. Aalisakkanik tunisinermi akit tunngavigineqartut aalisarnermi kattuffeqarfiit akornanni aalajangersarneqartariaqarput, pisortanit akuliuffigineqanngitsumik. Niuernermi akit tunngavigalugit aalajangersaanerit taamaallaat aalisarnermik inuussutissarsiummik pitsaasumik pilersitsisinnaapput.

Kisianni ATASSUT-ip suliassa qarfirmi tamatumani nunat allat iliuusaasa aalisartortatta naleqqutinngitsumik unammillerneqarnissaannut tutsinneqarnissaat tappiiffiginngilaa. Pisuni taamaattuni Namminersornerullutik Oqartussanut pisariaqalersinnaavoq aalisarneq tapersiiffigissallugu soorlu tunisinermut tapiissutit aqutigalugit. Tassunga atatillugu erseqqissarneqassaaq ATASSUT-ip pingaartimmagu aalisarnermi kattuffeqarfiit pisuni tamani aalisarnermut tunngasuni peqataatinneqartariaqartut.

Aalisartut aalisakkanillu suliffissuaqarnermi sulisut pikkorissut aalisarnermut sunniuteqarluartumut aammalu tunisassiornissamut unammilleqatigiiffiusumut naatsorsuutigeqqaagassaapput. Taamaattumik ATASSUT-ip aalisartunut aalisakkanillu suliffissuarni aalisarnermi ikiortinut ilinniarfusinnaasut assorsuaq pingaartippai. Aalisariutini isumannaatsuunissaq pitsaangorsartuariaqaproq ilaatigut akuttunngitsunik sungiusartarnikkut pikkorissartarnikkullu.

Uumasuuteqarneq nunalerinerlu

Savaateqarneq nunalerinermi inuussutissarsiutitut pingaarnersaajuassaaq. Tamanna ukiorpassuarni atuussimavoq inuussutissarsiutillu ilagilersimallugu aammalu siunissami ingerlaannarumaarluni.

ATASSUT-ip inuussutissarsiutip savaatilinnut imminut akilersinnaasunngortinniarlugu aqutissiuumavoq. Ukiuni makkunani savaatilinnut atugassarititat pitsaanerpaajunngiffiini ATASSUT-ip savaatillit qanimut oqaloqatigerusuppai aaqqissuussaannikkut pilersaarusoqqullugit, savaatillit ataannarnissaannut atugassarititat qulaakkeerneqarsinnaammata.

ATASSUT isumaqarpoq savaatillit siunissaat qulakkeerneqassappat pingaartorujussuusoq. Ukiukkut savat nerisassaannik avataaniit pisisarneq akisoorujussuuvoq. Taamaattumik narsaatit aallartinneqareersut suli ilungersuunneqarnerusariaqarput. Narsaatinik naggorissaanermut atatillugu aammattaaq naatitat allat nerineqarsinnaasut nunatsinni nioqqutigineqarsinnaasut naatinneqartarnissaat piareersarneqartariaqarpoq.

ATASSUT-ip aammattaaq savaatillit toqoraavimmik Neqi A/S-imik tiguisinnaanissaat misissorumavaa. Aammattaaq ATASSUT-ip savaatillit peqatigalugit misissorumavaa savat meqquinik tunisassiorneq periarfissaqarnersoq.

Narsaatinik naggorissaanermut atatillugu aammattaaq naatitat allat nerineqarsinnaasut nunatsinni nioqqutigineqarsinnaasut naatinneqartarnissaat piareersarneqartariaqarpoq.

Savaateqarnerup saniatigut tuttuuteqarneq siuarsarneqartariaqarpoq umimmaateqarnerlu aammattaaq eqqunneqassasoq misilinneqartariaqarluni.

Erngup nukinga iluaqutigalugu kukkukuuteqarfinnut innaallagissamik akikitsumik pissarsisinnaaneq misilinneqartariaqarpoq manninnik kukkukuuaqqanillu nammineq pilersornissaq pilersinniarlugu.

## Takornariartitsineq

ATASSUT-ip takornariartitsinermik inuussutissarsiuteqarnerup pitsaanerpaamik ineriartortinneqarnissaa sulissutiginiarpaa. Nunatsinni pinngortitaq inunnit nunarsuup annersaanik takunnissimasunit aammalu allatut ittunik takusaqarusuttunit takujumaneqartarpoq. Pinngortitaq uatsinnut – ingammillu nunami allamiunut – tupinnartumik pinnissuseqarpoq immikkut ittunik misigisaqartitsisartoq. Nalilinnik pigisatsinni tamanna annertoqaaq.

Tassunga ilanngunneqassaaq takornariat tamakkua nutaamik qanganisanngortunik inunnit aserorneqarsimanngitsunik takorusunnerummata. Kalaallit Nunaanni tamakkua tamaasa pisinnaavaat, pinngortitaq takornariat ornittagaannit allanit attorneqannginnerusoq takullugu piffissarlu naammagilerunikku hoteliminni avatangiisit nalinginnaasut uterfigisinnaallugit.

Takornariat piomasagaataannut inissat ikippallaarput akiliutigisinnaasavut. Hotelini inissat amerlisarniarnerannut aningaasaliissutit amerlaqisut pisariaqarput. Maannakkut aningaasaqarnerput aningaasaliissutinut taamaattunut naammangilaq. Taamaattumik aningaasaleerusuttut kajumissaartariaqarpavut utaqqinitsinnilu pioreersut ineriartortillugit aammalu allineqarnissaannut periarfissinnissaat misilillugit. Taamaattumik ATASSUT isumaqarpoq takornarianut naleqqunnerusumik politikkeqartariaqartugut.

Pioreersut pitsaanerusunik atugassittariaqarpavut. Nassuerutigisariaqarparput hotelit sutorniartarfiillu takornarianut pingaaruteqaqimmata. Taamaattumik taakkua aallaqaammut innaallagissamut imermullu akinik minnerpaanik tunineqartariaqarput, pissutigalugu annertuumik atuisuummata.

## Angallannermut politikki

Inuussutissarsiutip pitsaasup ineriartortittuarnissaanut naatsorsuutigeqqaagassat pingaartut ilagaat sunniuteqarluartumik angallannikkut aaqqissuussineqarpat. Tamatumani Kalaallit Nunaata iluani angallannerup aaqqissuussaana pineqarpoq taamatullu Kalaallit Nunaata nunallu allat akornanni angallannerup aaqqissuussaana.

Tamanna aningaasaqarnikkut ineriartornissamut pitsaasunik killiliissaaq. ATASSUT-ip taamaattumik pisortat angallannermut aningaasaliissutaasa nunap suatungaaniinnermi pitsaasumik agguataarneqarnissaasa qulakkeerneqarnissaat sulissutigiumavaa, taamaalilluni nunap immikkoortuini naligiimmik ineriartornissamut naatsorsuutigeqqaagassat taperserneqarsinnaammata.

Inuit eqqarsaatigalugit aaqqissuussineqassaaq paarilluakkamik, innuttaasunut suliffeqarfinnullu tikikkasuarnartumik – aammalu imaalillugu aaqqissuussamik, avatangiisit tatineqarnerat nuttarsinnaanerup inuiaqatigiinnut nassatarisartagaa sapinngisamik minnerpaanngortillugu.

## Angallannermut aningaasaliissutit

ATASSUT isumaqarpoq inuiaqatigiit eqqarsaataannartigut aalajangernernut akissaqanngitsut, aammattaaq angallannikkut suliassaqarfimmi, taamaattumillu ATASSUT mianersortorujussuarmik suliniarniarpoq tamatumani angallannermik aaqqissuussinerup annertusarneqarnissaa pineqarpat, tamatumani pineqarpoq silaannakkut angallanneq, imaatigut assartuineq nunamilu assartuineq.

Angallannermik aqqissuussinnermut qanoq sumilu aningaasaliissuteqarnissaaq pillugu aalajangerit peqqissaartumik pissaaq, inuiaqatigiit qanoq angallannermi aningaasaliissutinik iluaquteqarnerpaasinnaanerannik tamatigoortumik aammalu timalimmik misissuinerit tunngavigalugit.

Namminersortunut ingerlatassanngortitsineq

ATASSUT kisermaassilluni ingerlatsinernut suugaluartunulluunniit akerliuvoq – aammattaaq angallassinermik sullissinnermi. Taamaattumik ATASSUT-ip Kalaallit Nunaannut Kalaallit Nunaanniillu kiisalu Kalaallit Nunaata iluani kisermaassinerup atorunnaarsinneqarnissaa sulissutigaa.

Assartuinnermi akit assigiikkunnarnnissaat pisussanngulivippoq, ATASSUT-illu attuumassutillit oqaloqatigalugit assartuinnermut assigiimmik akeqartitsinerup peerneqavinnissaa sulissutiginiarpaa.

ATASSUT-ip umiarsuarmik timmisartumillu angallassinerep iluani namminersortumik angallassinermik suliniuteqarnerit tapersorsorpai. Naqisimaneqanngitsumik unammilleqatigiinneq angallasseriaatsimik aningaasartuuteqarnannginnerusumik qulakkeerissaaq.

Angallannikkut isumannaatsuunissaaq

Kalaallit Nunaanni pinngortitaq assissaqanngilaq isoqartuujullunilu aammalu innuttaasut amerlaqaat namminneq umiatsiaminnik angalassallutik aalajangertartut, aammattaaq tamatumani ornitassat ungasissut pineqartillugit. Naak innuttaasut amerlaqisut isumannaartumik umiartornissamut piumasaaqatit naammassisaraluaaraat ATASSUT isumaqarpoq sukkulluunniit isumannaatsuunissamut malittarisassaqartariaqartoq.

ATASSUT-ip Danmarkimi Søfartsstyrelsep oqaloqatigisarneratigut Kalaallit Nunaanni angallannermi isumannaallisaanerup pitsaanerpaanngortinnissaa sulissutigiumavaa. Tamatumani imaatigut assartuinnermi isumannaatsuunissaaq eqqarsaatigineqassaaq.

Angallannermi isumannaatsuunissap saniatigut avatangiisit isumannaatsuunissaat aammal ajunaarnersuaqarnissaanut sillimaniarneq eqqarsaatigineqassapput.

Ineqarnermut politikki

Namminerisamik ineqarnissaaq inuttut pisinnaatitaaffimmi tunngaviuvoq. ATASSUT taamaattumik isumaqarpoq Kalaallit Nunaata annersaani inissaaleqinerujussuaq akuersaarneqarsinnaanngilluinnartoq. ATASSUT-ip kissaatigaa kikkut tamarmik initaarnissaminnut naligiimmik periarfissaqartariaqartut.

ATASSUT-ip inuit ataasiakkaat ilaqtariillu inissaminnik namminneerlutik sananissaannut qiimmasaataasumik atugassarititat pilersinneqassasut. ATASSUT-ip suliffeqarfiit namminneerlutik sulisuminnut inissianik sanaartornissaat sulissutiginiarpaa, taamaalilluni inissiat allat iluaqutaasumik atugassanngortinneqarsinnaammata.

Pilersaarut ”attartortumiit atuisumut” ingerlateqqinneqassaaq. Kalaallit Nunaat nunarsuarmi ikittuinnaat ilagaat inissianik niuernerup pisortanit malunnaateqarnerpaaffia, soorlu ullumikkut

taamaattoq. ATASSUT-ip piffissaq ungasinnerusoq eqqarsaatigalugu pisortanit aningaasalersorneqartumik inissialiortiternermik pisariaqartitsinerup malunnaatilimmik annikillisinneqarnissaa sulissutiginiarpaa, taamalu initaarniarlutik utaqqisut allasimaffiinik amerlaqisunik ajornartorsiuteqarneq aaqqiivigalugu.

Qanorluunniit iliorluta tamanna mumikkaluarutsiguluunniit Kalaallit Nunaanni sumiiffinni immikkoortuni assorsuaq ineriartorneq pivoq. Tamatumani pingaartumik Nuuk, Sisimiut Ilulissallu pineqarput. Taamattumik pisariaqarpoq sumiiffinni taakkunani immikkut suliniuteqarnissaq. ATASSUT-ip ajornartorsiuteqaleriataartarnerit tamakkua sumiiffinni taakkunani pilersimasut sapinngisamik piaarnerpaamik aaqqiivigineqarnissaat sulissutiginiarpaa. Tamanna ilaatigut pisinnaavoq sapinngisamik inuit amerlasuut piginneqatigiilluni inissialiornissaq aammalu namminerisamik ininut assigiinngitsunik ilusilinnut sanaartornissaq pisortat aqutissiutuuppassuk.

Tamatuma peqatigisaanik ATASSUT-ip Kalaallit Nunaanni taarsigassarsiniartarfiup atuuttuurtussap pilersinneqarnissaa sulissutigaa, taamaalillutik inissianik sanaartorniartut inissiaatillillu taarsigassarsiniartarfimmit taarsigassarsisinnaangussammata aningaaserivinnit taarsigassarsianingarnit erniakinnerusunik. Piffissaq ungasinnerusoq eqqarsaatigalugu ATASSUT-ip politikkiata pisortanit aningaasalersorneqartumik inissialiortiternermik pisariaqartitsinerup malunnaatilimmik annikillisinneqarnissaa sulissutiginiarpaa, taamalu initaarniarlutik utaqqisut allasimaffiinik amerlaqisunik ajornartorsiuteqarneq aaqqiivigalugu.

Inissianut ileqqaaruteqarnerit akileraarutitigut oqilisaassivigineqartut pillugit suliniutit pitsaasut ingerlateqqinneqassapput, taakkuami piffissaq ungasinnerusoq eqqarsaatigalugu ineqarniarnermi ajornartorsiutinik ullumikkut atuuttunik annertoqisunik aaqqiissutaaqataassammata. ATASSUT-ip taamaattumik inuusuttut 18-iniit 2-nut ukiullit namminneq ileqqaakkaminni akileraarutitigut akiliutissatik ineqarnissamut siunertanut aalajangerlugit aqutissiunneqarnissaat sulissutigaa.

Inissianik allaffissornikkut aqutsineq

A/S Inissiaatileqatigiiffiup INI-p inissianik aqutsinerup iluani kommunit piimasaasa naammassineqarnissaanni annertuunik ajornartorsiuteqarnera ATASSUT-ip nalunngilaa.

Ullumikkut kommunit arlaqarput ingerlatseqatigiiffimmut atajunnaalersut. Kommunini kommunit inissianik aqutsiviini aammattaaq A/S INI allaffeqarfeqarpoq. Tamanna marloriaammik allaffissorneruvoq inuiaqatigiinnut aningaasarpassuarnik naleqartoq.

Kommunit naammagittaalliuteqarnerisa saniatigut atuisartut nalinginnaasut ingerlatseqatigiiffiup inissiaataannik atuisut arlaleriaqalutik ineqarnermut demokratiip siunertaa paasissallugu ajornartorsiutigisarpaat. Taamaattumik ATASSUT ingerlatseqatigiiffiup qulaajaaviginissaanik suliniuteqarusuppoq.

Nalinginnaasumik inissialiortiterneq

Naak inuit/ilaqutariit amerlaqisut namminerisaminnik inissialiorsinnaagaluartut innuttaasunut nalinginnaasumik inissiat attartortittakkat atorfissaqartinneqartuassapput. Taamaattumik ATASSUT-ip taakkua Kalaallit Nunaanni neqeroorfiguarnissaat qulakkeerusuppaa.

Aningaasaqarnermut politikki



Aningaasaqarnermut politikkiimi tunngaviusut tassaapput aningaasatigut isertitat Nunatta Karsianut ingerlaartartut, taakkua tassaapput ataatsimoortumik tapiissutit, akitsuutit, akileraarutit, EU-p isumaqatigiissutaanit aningaasaliussat kiisalu Namminersornerullutik Oqartussat namminneq suliffeqarfiutaannit ernianit isertitat assigiinngitsut.

Kalaallit Nunaata aningaasarsiornerani ullumikkut aalajangiisuupput naalagaaffimmit ataatsimoortumik tapiissutit aammalu aalisarneq, ullumikkut Kalaallit Nunaanni avammut tunisassiorluni inuussutissarsiutituaasoq.

ATASSUT-ip piffissamut sivisuumut pingaartillugu anguniagaa tassaavoq

Kalaallit Nunaat ataatsimoortumik tapiissutinik isumalluuteqarunnaassasoq. Naak danskit naalagaaffiata ilagigaluaaratigut – aammalu taamaattuarumaarluta, soorunami pisussaaffigaarput immitsinnut aningaasaqarneq eqqarsaatigalugu ikiorniassalluta.

Tamanna pissaaq inuussutissarsiornikkut polikkikkut suliffissanik pilersitsisukku aammalu aningaasaliisinnaassuseqartukku, aatsitassanik pissamaatitta atorneqarnissaannik aallartitsisinnaasumik. Aammalu takornariartitsinerup ineriartortinnissaata annertuumik pingaartinneqarneratigut, tamatumalu peqatigisaanik aalisarnermik inuussutissarsiuteqarneq ataavartumik nutarterinissamut naleqqussarnissamullu sapinngisamik pitsaanerpaanik atugassartissallugu qulakkeerutsigu, soorunalimi aamma aalisakkatta nungusaataannngitsumik iluaqutigineqarnissaanni killissarititat iluanni.

Namminersortumik inuussutissarsiuteqartut ineriartornissaannut periarfissanik piukkunnartunik tuninerisigut suliffiit nutaat pilersissavavut taamalu inuiaqatigiinni ineriartorneqalerluni.

Aningaasarsiornikkut namminersornissatsinnik kissaatigisatta piviusunngortinnissaanut tunngavissat pilersikkumallugit aningaasaqarnitta sukannersumik aqunneqarnera ATASSUT-ip pilersitseqataaffia ingerlateqqittariaqarparput.

ATASSUT-ip Nunatta Karsiata aningaasaataanik akisussaassuseqartumik piviusorsiorlumillu missingersuusiortarneq aammalu malitseqartitsisarnissaq sulissutiginiarpaa. Ileqqaarfigisinnaasavut ileqqaarfigissavavut. Taamaaliornitsigut suliassaqarfiit immikkut suliniuteqarfissat eqqarsaatigalugit akissaqalersinnaavugut. Ingerlatsinerumut aningaasartuutini annertuumik torersaanissaq pissaaq. Namminersornerullutik Oqartussani sullissinermi suliaqarfiit tamaasa misissueqqissaarfiginerisigut suliassaqarfinnut immikkut suliniuteqarnissamik pisariaqartitsinerusunut aningaasat nassaarineqassapput.

ATASSUT-ip pisortat allaffissornerat aammalu inatsisiliornermut tunngasut sunniuteqarnerusunngortinnissaat sulissutiginiarpaa aningaasaqarnikkut sulisoqarnikkullu pisariillisaaneq aqputigalugu. Taamaaliornikkut innuttaasut tamarmik immikkut pisortanit sullinneqarnerat ajornannginnerulerlunilu pitsaanerlersinnaavoq.

ATASSUT-ip nukissamik nammineq pilersorsinnaanerup, assersuutigalugu erngup nukinganit innaallagissiorfiit aamma seqernup nukingata ineriartortinneqarnissaasa aqputissiuunneqarnissaat sulissutiginiarpaa. Ikummatissamik avataaniit pisisarneq isumalluutigiunnaartariaqarparput. Tamanna namminersortunik atuisunut akikinneruinnanngilaq, aammattaarli tunisassiorfittut suliffeqarfinnut annernut mikinernullu annertunerusumik tunngavissat pilersinneqassallutik.

Tamatta kissaatigaarput Kalaallit Nunaata nunataata ataani uuliamik nassaartoqarnissaa iluatsikkumaartoq. Nunamik piginnittusnaanitta Danmarkimik isumaqatigiinniutiqeqaqqinnissaanut pisinnaatitaaffik ATASSUT-ip sulissutiginiarpaa. ATASSUT-ip taamaalilluni Kalaallit Nunaata Danmarkillu akornanni 75/25-mik aveqatigiittarnissap anguneqarnissaa sulissutiginiarpaa.

Akileraarutinut politikki

Akileraarusiisarneq tamarmiusoq qaffaateqaqqissanngilaq, tamanna ATASSUT-ip erseqqissumik anguniagaraa.

Akerlianik akileraarusiisarnerup appartinnissaa siunnerfigaarput – pingaartumik inuussutissarsiutitigut akileraarusiisarneq. Aningaasat akissarsiatta aqunnissaannut inuttut annerusumik kiffaanngissuseqarnissarput qulakkeerneqartariaqarpoq, aammalu nunatsinni suliffinnik inuussutissarsiorfiusunik pilersitsinissarput soqutiginarnerusunngortittariaqarparput, taamaalilluta tamanut suliffissat qulakkeersinnaagatsigik.

Inuiaqatigiit uagut allaffissornikkut aqunneqarpallaarpugut. Tamanna akileraarutitigut koruuninik akeqaannanngilaq, aammattaarli uatsinnik oqartussaassuseqarunnaarsitsilluni. ATASSUT-ip inuit ataasiakkaat namminersorusunnerisa qiimmassarneqarnissaat kissaatigaa – nalunaaquttap ingerlarnata nammineerluta suliniuteqarnissatsinnik neqerooruteqarneratulli, nammineerluta qanoq inuuneqarnissarput pilersillugu. Suliffissanik pilersitsiniarneq – suliartortarnissarlu imminnut akilersinnaasariaqarput.

Tamanna ATASSUT-ip aningaasarsianit akileraarutit appartinneqarnissaannik kissaateqarneranut tunngaviuvoq. Suliartortarneq immiut akilersinnaasariaqarpoq, taamatuttaarlu suliffinnik pilersitsinissaq kajungernartuusariaqarluni. Tamanna suliffissaaleqinerup akiorniarnissaanut periaasiuvoq pitsaanerpaq.

Aningaasarsianit akileraarutit appartinniaaraanni pisortani aningaasartuutit ikilisinneqarnissaat periaasissatuaavoq.

ATASSUT-ip taamaattumik allaffissornikkut pisariillisaanerit allanngortiterinerillu ingerlanneqarnissaat kissaatigaa, taamaalilluni sulisinnaasut annertunerujussuarmik namminersortunngorsarneqassammata aammalu siunertalimmik pilersitsinissaassuseqarnermut ingerlatinneqarlutik. Kissaatigaarput innuttaasut sapinngisamik pisariitsumik sunniuteqarluartumillu sullinneqassasut.

ATASSUT-ip siunissami akiligassanik akilinngitsuukkanik ajornartorsiutit pinaveersaartinniarpai politikki inuiaqatigiit akiliutinut inuiaqatigiit akileqqusaannut akiliinissaminnut periarfissiisussaq aqqutigalugu. Tamanna kommunini – aammalu Nunatta Karsiani amerlanerusunik aningaasassaqtitsilissaaq.

Inuiaqatigiinnut ilusissaq nutaalerisoq aammalu inuttut atukkanik oqimaaqatigiissarisooq maanna saqummiupparput. Taanna inuit ataasiakkaat namminneq suliniutaannik siuarsaassaaq inuiaqatigiussutsitsinnut tamarmut iluaqutaasumik.

Avatangiisinut politikki

ATASSUT-ip avatangiisinut politikkaa pinngortitami pisuussutit ataqqineqarnissaannik aallaaveqarpoq. Suliassaq tassaavoq inuup suliniuteqarnera aammalu pinngortitamik innarlitsaaliuineq pitsaasoq ataatsimoortissallugit.

ATASSUT-ip avatangiisinut politikiani anguniagaasoq tassaavoq tunisassioriaatsini inuullu pissusilersornerani nunami issittumi inuunissamut tunngavissat paarineqarnissaasa eqqarsaatigineqarnissaat. Tamatumuuna avatangiisit minguinnerusut inuussutissallu peqqinnarnerusut qulakkeerneqassapput.

Avatangiiserput mianernarluinnartoq avatangiisit allanngutsaaliornissaannut annertuumik piumasaaqateqarfiuvoq. Taamaattumik ATASSUT-ip Kalaallit Nunaata eqqiluutsuunissaa sorsuutigaa. Tunngavigineqartussa qingaerneq tassaasariaqarpoq mingutsitsisup nammineerluni eqqagassaminut avatangiisinut isumannaatsumut ajukuusarbussaam tamatumani suliffissuaqarnermi eqqagassat igaffimmiilluunniit nalinginnaasumik eqqagassat pineqaraluarpataluunniit. Akerlianik inuiaqatigiit qulakkiissavaat innuttaasut suliffeqarfiillu eqqagassanik avatangiisinut isumannaatsumik eqqaasarnissaat.

Taamaattumik ATASSUT-ip anguniagaa tassaavoq illoqarfiit nunaqarfiillu tamarmik eqqakkanut ikuallaaveqarnissaat. Illoqarfiit eqqarsaatigalugit ikuallaaviit kissarnerup atorunnaartup kiassarnermut siunertanut iluaqutigineratigut. Pingaartumik nunaqarfiit amerlaqisut eqqagassatigut ajornartorsiuteqarput, pissutigalugu avatangiisinut isumannaatsumik eqqaavilerisoqarneq ajormat. Taakkunani ikuallaaveeqqanik taaneqartartut nunaqarfiit angissusiinut naatsorsuussat pilersinneqartariaqarput.

Kalaallit Nunaata nunarsuarmi nunani eqqiluinnerpaajunera minguinnerpaamillu imeqarnera pilerisaarutigisarpaq. Pissutsit takkua iluaqutiginiassagaanni pisariaqarluinnarpoq innuttaasut tamarmik immikkut pinngortitap erngullu aammattaaq uppernarsaatitalimmik eqqiluutsuunissaannut akisussaassuseqalerpata.

Siunissami kinguaariit tulliuuttussat avatangiisinik ullumikkorninngarnit eqqiluinnerusunik qimatsivigissallugit akiligassaqarfigaavut. Avatangiisinut eqqiluinnerusunut aqutissaq siulermik pingaarnepaamillu tassaavoq qaammarsaaneq siunnersuinerlu, imaanngitsoq inerteqquteqarneq peqqussuteqarnerlu aqutigalugit. Avatangiisinik paasisimasaqarnissaq akilersinnaasariaqarpoq.

Takornariartitsinermi ineriartornikkut iluatsissagaanni naatsorsuutigeqqaagassaq erseqqilluinnartoq tassaavoq eqqagassatigut ajornartorsiutitsinnik taakkunanga aaqqiisinaanissarpaq, ajoraluartumilli takornariat amerlanertigut naapittagaat tassaapput illoqarfiit nunaqarfiillu eqqagassarsuarnik ulikkaartut. Taakkualu pinngortitami eqaloqarfinnut tupersimaartarfinnuunniit pigaangamik amerlanertigut eqqiluisaannginnersuaq tupaallaatigisarpaat.

Uuliamik qalluisinnaanermi aatsitassarsiornermilu avatangiisinut isumannaatsumik iluaquteqarnissaq qulakkeerniarlugu suut tamarmik sakkugineqassapput.

Inuit ataasiakkaat avatangiisinut akisussaanagerat

Inuit ataasiakkaat pinngortitap namminnerlu peqqinnissap paarinissaanut inuttut akisussaassuseqarnermik misigisimassapput. Pisuussutit ileqqaarnerisigut, tunisassiat avatangiisinut annikinnerpaamik ajoqusiisinnaasut pisiarinerisigut, eqqakkat annikillinnerisigut, peqqissumillu

inuuneqarnitsigut tamatta immikkut avatangiisit innarlitsaaliorneqarnerannut ikiorseeqataasinnaavugut, aammalu mingutsitsineq peqqinnissamullu ajoqutaasinnaasut pinaveersaartinnissaannut.

Piginnittussaassusermut aammattaaq avatangiisit sapinngisamik innarlitsaaliornissaannut akisussaaqataaneq malinnaavoq. ATASSUT-ip avatangiisinut politikkimini aallaavia tassaavoq mingutsitsisup ajoqusiinerit, soorlu avatangiisinut mingutsitsisumik atuineq imaluunniit tunisassiornerup avatangiisinut sunniuteqartitsinera, akiligassarigai. Aningaasaqarnikkut kajumissaarisooqassaaq avatangiisinik innarlitsaaliuineq pitsanngorsaanerlu pilerinartunngorlugit.

Niuernikkut aaqqiissutit tamatigut kisimik avatangiisinik innarlitsaaliuinermi naammaginartumik aaqqiissutaasinnaangillat. Aallaaviusooq tassaassaaq niuernikkut pitsaaqutitigut tunisassiornerup atuisullu avatangiisinik pitsanngorsaaniissamut soqutiginnilersinnissaat. Inerteqquteqarnerit peqqussuteqarnerillu taamaallaat atorneqartariaqarput niuernikkut aaqqiissutit suliasamik naammaginartumik aaqqiissutaasinnaangikkaangata.

Mingutsitsineq nunat killeqarfii apeqqutaatinnagit akiorniarneqassaaq

Mingutsitsinermi nunat killeqarfiit eqqarsaatigineqarneq ajorput taamaattumillu nunat killeqarfii apeqqutaatinnagit aammattaaq akiuiniartoqartariaqarluni.

Nunat issittumiittut mianernartorujussuummata ATASSUT-ip kissaatigaa nunani eqqaamiorisani tamani avatangiisit innarlitsaaliorneqarnissaannut minnerpaanik piunasaqaateqarnerup atulersinneqarnissaa.

Pisariaqarpat avatangiisit innarlitsaaliornissaannut akitsuutit atulersinneqartariaqarput, mingutsitsinermi ajornartorsiutit aaqqinneqarnissaat siunertaralugu.

Mingutsitsinaveersaarnermut akitsuutit

Ajornartinnagu tunisassianut aalajangersimasunut mingutsitsinaveersaarnermi akitsuutit atulersinneqarsinnaapput. Akitsuutit tunisassianik pineqartunik tunisassiornermi atuinermilu inuiaqatigiinnit avatangiisit artorsartinneqarnerat takuneqarsinnaasariaqarpoq.

Mingutsitsinaveersaarnermi akitsuutit avatangiisinut pitsaasumik sunniuteqartariaqarput. Atuisooq tunisassiornerluunniit akitsuutit nammakkiissutaanerit pinngitsoorsinnaassavaa annikillisilluguluunniit atuinerup tunisassiornerullu allannngortinneratigut. Mingutsitsinaveersaarnermi akitsuutit akileraaruteqartitsinermik tamarmiusumik annertunerulersitsissanngillat, taamaallaalli pinngortitami pissusilersornermut aningaasaqarnikkut kajumissaarutaassallutik.

Avatangiisinut politikki sulianik ilisimasatigut aqunneqassaaq imaanngitsoq politikikkut ingerlaarnertigut

Oqartussaasut suliffeqarfinit annertunerpaamik mingutsitsinermit akuerineqarsinnaasumut piunasaqaatinik aalajangersaassapput. Avatangiisitigut akuersissutinut taamaattunut atatillugu mingutsitsinerup annikillisarnissaannut peerneqavinnissaanulluunniit aningaasaqarnikkut kajumissaatit atulersinneqartariaqarput.

Avatangiisit peqqinnissallu naammaginatumik innarlitsaaliernerat kajumissaataannartigut qaammarsaannikkulluunniit anguneqarsinnaanngippat peqqussuteqarnissaq inerteqquteqarnissarlunniit pisariaqarsinnaapput. Inerteqquteqarnissaq peqqussuteqarnissarlul ilisimatusarnermik aammalu sulianik ilisimasanik tunngaveqartariaqarput, imaanngitsoq politikikkut nalaatsornerinnarmik ingerlaarnertigut.

Avatangiisit peqqinnissallu qaammarsaatigineqarnerat tunngaveqarluartoq arlaannaannullu attuumassuteqanngitsoq

Avatangiisinut politikkip aqunneqarnerani nunat issittut mianernartorujussuunerat aallaavigineqassaaq. Inatsisiliap pingaernerup iluani killilliussatigut avatangiisitigut akuersissutinik aalajangiinerit pilersarusiornerillu najukkani assigiinngitsuni oqartussaasunut saqqummiunneqartassapput.

Innuttaasut ataasiakkaat atuineri qinigassanik assigiinngitsunik toqqaanerup avatangiisitigut peqqinnissakkullu kingunerisassani paasisimasaqarnerulersinniarlugit avatangiisit peqqinnissarlul pillugit tunngaveqarluartumik aammalu arlaannaannulluunniit attuumassuteqanngitsumik qaammarsaasoqarnissaa qulakkeerneqartariaqarpoq.

Nukissiuuteqarnermut politikki

Nukissiuuteqarnermut politikikkut ATASSUT-ip nunatta uuliamik isumalluuteqarnerata annikillisinneqarnissaa kissaatigaa, tamannalu pisariaqarluni inuiaqatigiit aningaasaqarnikkut pisinnaasai peqatigalugit imaluunniit namminersortumik aningaasaliisut aqqutigalugit – erngup nukinganit innaallagissiorfiit pilersinnerisigut. Tamatumunnga atatillugu taaneqassaaq EU-mut ilaasortaanermi Kalaallit Nunaat EU-p aqqissuussinermut aningaasaateqarfiinit pissarsisinnaagaluarmat, ilaatigut nukissiuutinut sivisuumik piusartunut soorlu erngup nukinganut.

Utoqqarmiut Kangerluarsunnguanni erngup nukinganit innaallagissiorfik pisiaavoq inuiaqatigiinnut akisooq aammalu nunatta tamarmi akileraarutit aqqutigalugit akilersimasaa. Taamaattumik nukissiuutinut uuliatortunut naleqqiullugit erngup nukingani ingerlatsinikkut ileqqaarutit tamarmik aammattaaq innaallagissamik atuisunut tamanut iluaqutaasariaqarput. ATASSUT-ip taamaattumik kissaatigaa kikkunnulluunniit tamanut innaallagissap akiisa qaffaseqisut appartinneqarnissaat.

Avatangiisit eqqarsaatigalugit innaallagissap akiisa innaallagissamik kiassarnermut ikaarsaariarnissat kissaatigaarput, tamatumani erngup nukinganit tunngaveqartumik innaallagial pineqarsinnaappat. Tamatuma kingunerisavaa innaallagissap akiinik assigiinngisitaartunik atuilernissarput – innaallagissamik nalinginnaasumik atuineri aammalu kiassarnermut.

Aammattaaq suliffinnik pilersitsisut avataniillu pisiortormik killiliisutut inuussutissarsiorfiit kiisalu avammut tunisassioritut inuussutissarsiorfiit nukissamik annertuumik atuisut innaallagissamut appasissumik immikkut akiliuteqartarnissaat ATASSUT-ip kissaatigaa. Tamanna inuussutissarsiuuteqarnermi annertunerusumik unammillersinnaassuseqalersitsissaaq aammalu Kalaallit Nunaanni suliffiit pilersinneqarnissaannut siuarsaataalluni.

Uulia uuliamillu tunisassiat erngup nukinga atorneqarnerulerualuarpataluunniit inuiaqatigiussutsitsinni pingaartumik inissisimajuassapput. Avammut tunisassiornikkut inuussutissarsiuutitta pingaarnersaanni aalisarnermi uulia uuliamillu tunisassiat

pingaaruteqarluinnarput. Taamaattumik pingaartuuvoq uuliap benziinallu akiisa sapinngisamik appasissuutinniarnissaat. Tamanna inuussutissarsiuteqartut unammilleqatigiinnerannik patajaallisaassaaq.

ATASSUT taamaattumik isumaqarpoq uuliamik ujarlernermit pimoorussaanut atugassarititat pilersissagivut, ilaatigut uulia sapinngisamik akikinnerpaaq qulakkeerniarlugu ilaatigullu uuliamik immitsinnut pilersortunngortinniarluta kiisalu nunat allamiut aningaasaasa pissarsiarinissaannut nutaamik pissarsiviusussat pilersinniarlugit. Uuliamik ujarlerneq avatangiisitigut sillimaniarnermi suliniutit sapinngisamik annertuut isiginiarnerisigut pissaaq, taamaalilluni pisuussutivut uumassusillit eqqorneqassanngimmata.

ATASSUT-ip erngup nukingani innaallagissiorfiit aammalu seqernup nukissiorfiit orninneqarsinnaasuni pilersinneqarnissaat sulissutiginiarpaa. Peqqissaartumik pilersaarusiortoqartariaqarpoq taamaalilluta sapinngisamik piffissami sivisuumi iluaquteqarsinnaassagatta.

Erngup nukingata iluaqutiginerani innaallagisaaq akikitsoq ilaatigut naatitsivinnut, kukkukuuteqarfinnut manninnik kukkukuuaqqanillu nammineerluta pilersornissatsinnut pissarsiarineqarsinnaanersoq misissorneqartariaqarpoq.

Nukissiuuteqarnikkut politikimi ATASSUT-ip nunatta uuliamik isumalluuteqarnerata annikillisinneqarnissaa kissaatigaa, imermik pissamaatitta inuiaqatigiinni aningaasaqarnikkut akiliisinaanerput ilutigalugu imaluunniit namminersortumik aningaasaliisut aqutigalugit erngup nukingani innaallagissiorfiit pilersinnerisigut.

ATASSUT-ip kissaatigisaa tassaavoq suliffissanik pilersitsisut avataniillu pisiortornermik killiliisutut inuussutissarsiorfiit kiisalu avammut tunisassiorlutut inuussutissarsiorfiit nukissamik annertuumik atuisut innaallagissamut appasissumik immikkut akiliuteqartarnissaat. Tamanna inuussutissarsiuteqarnermi annertunerusumik unammillersinnaassuseqalersitsissaaq aammalu Kalaallit Nunaanni suliffiit pilersinneqarnissaannut siuarsaataalluni.

Uulia uuliamillu tunisassiat erngup nukinga atorneqarnerulernerarlalluunniit inuiaqatigiussutsitsinni pingaartumik inissisimajuassapput.

Avammut tunisassiornikkut inuussutissarsiutitta pingaarnersaanni – aalisarnermi uulia uuliamillu tunisassiat pingaaruteqarluinnarput. Taamaattumik pingaartuuvoq uuliap benziinallu akiisa sapinngisamik appasissuutinniarnissaat. Tamanna inuussutissarsiuteqartut unammilleqatigiinnerannik patajaallisaassaaq. ATASSUT taamaattumik isumaqarpoq uuliamik ujarlernermit pimoorussaanut atugassarititat pilersissagivut, ilaatigut uulia sapinngisamik akikinnerpaaq qulakkeerniarlugu ilaatigullu uuliamik immitsinnut pilersortunngortinniarluta kiisalu nunat allamiut aningaasaasa pissarsiarinissaannut nutaamik pissarsiviusussat pilersinniarlugit. Uuliamik ujarlerneq avatangiisitigut sillimaniarnermi suliniutit sapinngisamik annertuut isiginiarnerisigut pissaaq, taamaalilluni pisuussutivut uumassusillit eqqorneqassanngimmata.

Aatsitassanut politikki

ATASSUT aallaqqaataaniilli nunatta aningaasarsiornera eqqarsaatigalugu aatsitassanik iluaquteqarnissamut partiinit erseqqinnerpaajuvoq.

ATASSUT-ip tamatigut ilungersuutiguarpaapaa pisuussutininik uumaatsunik ujarlernerit iluaquteqarnissamik siunertaqarnissaat – aammattaarli mingutsitsinissaq sapinngisamik annerpaamik killilerlugu.

Arlaqarnerusunik misigissuseqartariaqarpugut, taamaalilluta inuiaqatigiit pinngortitap nalunartuinut malussarsissusiat annikillisassagatsigu. Taamaattumik aalisarnermik inuussutissarsiutitsinnut malunnaateqarnerpaamut qinigassaasinnaasunut allanut tunngavissamik pilersitsisariaqarpugut.

ATASSUT-ip nalunngilaa aatsitassarsiorneq Kalaallit Nunaata aningaasarsiornerani pinngitsoorneqarsinnaanngimmat, imaanngitsoq qanorluunniit akeqaraluarpat, tassami inuussutissarsiutit allat mingutsitsinikkut aserorsaataasinnaasut pinngitsoorneqartariaqarmata.

Kommunikkoortumik politikki

ATASSUT-ip suliassat akisussaaffiillu siamarneqarnissaat sulissutiginiarpaa, taamaattumillu pisortat allaffissorneranni atugassarititat ingerlaavartumik naleqqussarneqartariaqarlutik, suliata naammassineqarnissaat allaffissornerlu sunniuteqarluartussaq siunertaralugit.

Inuiaqatit eeqaamiut ineriartortinneqassapput patajaallisarneqarlutillu. Innuttaasut qanimut, piviusorsiornermik aammalu pinngitsoorani ataatsimoornissamat killiliussanik pilersitsissapput, suliassanik qitiusumik oqartussaasuneersunik suliaqarsinnaasunik, aammalu inuttut atukkatigut peqqinnissakkullu ajornartorsiutinik pinaveersaartitsillutillu isumaginnissinnaasunik.

Inatsisiliorneq allaffissornerlu inuiaqatigiinni isumassarsiorsinnaanermut iliuuseqarsinnaanermullu uniffiusariaqanngillat, akerlianilli ineriartornissamat periarfissanut pilersitseqataassallutik. Inuiaqatigiinni suliffinnik aallartitsiniartut annertuneroqisumik periarfissaqartariaqarpugut.

Kommuni innuttaasut pillugit atuuppoq. Kommunimut saaffiginninnissaq pisariunanilu ajornanngitsuusariaqarpoq.

ATASSUT-ip taamaattumik allaffissorneq pisariunngitsoq atuisunullu naleqquttoq pingaartippa. Kommunitinnut saaffiginnikkutta pimoorussamik sukkasuumillu sullinneqarnissarpugut pisussaaffigaarpugut. Aammami tassaavugut innuttaasut ingerlatsinermit akileraarutit aqutugalugit akiliisartut.

ATASSUT-ip taamaattumik qulakkerusuppaa inuit ataasiakkaat akileraarutitigut akiliutaasa innuttaasunik kiffartuussinermit atorneqarnissaat allaffissornermit iluamik ingerlanngitsumit nerineqartut pinnagit. Aammami aningaasaatitta atorneqarnerat imaanngilaq soqutaanngitsoq.

ATASSUT-ip kommunini pitsaannerusumik aqutsinissamat kiffaanngissuseqartumik iliuuseqarnerusinnaaneq kissaatigaa.

ATASSUT-ip kommunit iluanni inuttut suliniuteqarsinnaanerpugut inissaqarnerunissaa kissaatigaa. Kalaallit kultureqarnermit pitsaasoq puigortarpugut. Inuiaqatigiussuserput Europap kitaamiuisut aqqissuunnarlugu ulapippallaarpugut. Immitsinnut takornartannngortissimavugut. Annertunerujartuinnartumik meerartavut meeraaqqerivinni, meeqqerivinnilu inissittarpavut, napparsimasortavut utoqqartavullu paaqqinniffinni utoqqaallunniit illuini. ATASSUT isumaqanngilaq paaqqinnittarfiit pinngitsoorneqarsinnaanngitsut, kissaatigaarpulli ilaqtariit

suliassamik namminneerlutik isumaginissaannut pitsaanerusumik periarfissinneqartariaqartut. Nutaamik eqqarsartariaqarpugut.

Angajoqqaat meeqqamik paaqqutarinissaannut nammineersinnaanngitsut imaluunniit ilaqquttat piffissami namminneerlutik qanigisaminnik napparsimasunik imaluunniit ilaqquttaminnik utoqqarmik nammineersinnaanngitsumik paaqutarinnittut, taakkua kommunimit ajunngitsorsiassanik pissarsinissaminnut periarfissaqartariaqarput. Aaqqissuussineq taamaattoq ilaqutariittut ataatsimoornermik toqqissimanarnerulersitsillunilu siuarsaassaaq. Aningaasat aaqqissuussinnermut atugassat kommunit Namminersornerullutillu Oqartussat paaqqinnittarfinni inissanik paaqqinnittarfinnillu pisariaqartitsinerup annikillineratigut ileqqaarniutitut pissarsiarisartagaannit kiisalu napparsimmavinni inissat allanut atugassanngortinnerisigut pissarsiarineqartariaqarput.

Inuttut suliniuteqarnerup kommunini ipitinneqartarnera akulikippallaarpoq. Tamanna inuussutissarsiutit ineriartortinnissaannut ajoqutaavoq. Inuussutissarsiutitigut suliniutit allaffissornikkut suleriaatsini eqartuni suujunnaarsinneqartarput. Suliamik ingerlatsinerit sivisuallaamik ingerlanneqartarput tapersorsorneqarnissamillu pisariaqartinneqartumik amigaateqarlutik. ATASSUT-ip pissutsit taamaattut iliuuseqarfiginiarpai. Kommunit patajaallisarumavavut, suleqatinngortinniarpavut inuussutissarsiuteqartunut innuttaasullu tamaasa eqqarsaatigalugit eqaatsutut. Tamannali naammangilaq.

ATASSUT-ip aammattaaq nunap immikkoortuisa kommunillu akornanni suleqatigiinnissaq kissaatigaa. Pingaartuuvoq kommunit suliffissat assigisaallu pillugit imminnut akerleriilinninnissaat. Tamanna kommuninut sanngiillisaataassaaq aammalu amerlanertigut akileraarutitigut aningaasat kommunip eqqaamiorisap iluaqutiginninnissaa anguniarlugu akerleriinnermi maangaannartinneqassallutik.

ATASSUT-ip kommunit KANUKOKA suleqatigalugu nunap immikkoortuini ineriartornissamut pilersaarusiornissaat sulissutiginiarpaa. Tamanna nunap immikkoortuini inuussutissarsiutitigut ineriartortitsinnermut patajaallisaataassaaq, pissutigalugu inuussutissarsiuteqartut aningaasaleerusunnerat annertusissammat, taakkua aningaasaliissutitik annertunungaartumik siunertanut sammisumik pilersaarusiorsinnaalerpatigik.

ATASSUT-ip kommunikkoortumik politikkiata kommunit patajaallisassavai, taakkua kiffaanngissuseqarnerusumik iliuuseqarsinnaanerannik tuninerisigut taamalu pitsaanerusumik aqutsinissaannut periarfissinnerisigut.

ATASSUT-ip Kommuneqarfiit Kattuffiata, KANUKOKA-p, qanimut oqaloqatigisarneratigut Namminersornerullutik Oqartussat kommunillu akornanni nammagassanik suliassanillu agguaassineq kommuninut taakkunanilu innuttaasunut piviusorsioortumik isumnaatsumillu ineriartortinneqassasoq sulissutiguarniarpaa.

Qularutigineqassanngilaq ATASSUT-ip tamatigut Namminersornerullutik Oqartussat kommunillu akornanni pilersaarutini tamani pissutsit pitsanngorsassallugit aalajangiisimammagu. Pingaartuuvoq innuttaasut toqqissisimallutik Namminersornerullutik Oqartussanit kommuninillu sullinneqarsinnaassappata.



Kommuni Namminersornerullutik Oqartussani malittarisassanit qilersorsimangippat taava taassuma suliaasat najukkani assigiinngitsunut naleqqunnerpaat isumagissallugit toqqarsinnaavai. Tamanna innuttaasunut pitsaanagerusumik sullissinermik kinguneqassaaq aammalu akileraarutigut akiliutitta aammalu kommunikkoortumik atatsimoortumik tapiissutit pitsaanagerusumik atornerqarnissaat qulakkeerneqarluni.

Naalagaaffeqatigiinneq

Nunarsuarmioqatigiinni innuttaasut ataatsimoornerujartuinnarneranni naalagaaffiit assigiinngitsut imminnut qanilliarlorlutik ineriartorfianni aammalu allaat ataatsimut kattunnissaminnut aqqutissiulerfianni ATASSUT isumaqarpoq Kalaallit Nunaanni partiinit ataasiakkaanit namminersulernissamik kissaatigineqartut nunarsuarmioqatitta sinnerinut tulluurtuunngitsut.

Soorunami inuiaqatigiivugut, aammalu soorunami kulturerput immikkuullarissuunerpullu illersussallugit, kisiannili Danmarkimit nunarsuarmioqatinillu avissaarutta naleqassuserput annerulissasoq uppersissagutsigu tamanna nunarsuarmioqatitsinnut attaveqarnitsinni akisoorujussuanningsinnaavoq .

Kalaallit Nunaata piffissap sivisuallaanngitsup ingerlanerani naalagaaffittut namminersortutut anguniagai piviusorsioortuunngitsut piviusunngortinneqassappata tamanna inuiaqatigiit ilarpassuisa inuuniarnermut tunngaviaannut akisoorujussuussaaq. Tamannaannaanngilarli, aammattaaq aningaasaqarnermik aqutsinitsinnut pitsaasumut piviusorsioortumullu pilersinnialikkatsinnut aseruutaassalluni.

Taamaattumik ATASSUT-ip naalagaaffeqatigiinnerup iluani nammieersinnaaneq isumaqatigaa, imaanngitsoq ATASSUT-ip naalagaaffeqatigiinneq aammalu naalagaaffiup ataatsimoortumik tapissutai sinnassaatit atorniarmagit, taamaanngilluinnarpoq.

Namminersuleriartuaarneq isumannaatsumik piviusorsioortumillu ingerlasariaqarpoq, taamaalilluta qulakkiissagatsigu innuttaasut tamarmik peqataanissaat. Tassami piffissaq ingerlassaaq inuiaqatigiittut imminnut makitinnissaata aammalu nunatta aningaasaqarnikkut imminut napatilernissaata, taamalu nunatut namminersortunngornissaat, tungaanut.

Innuttaasut naalagaaffittut namminersortutut anguniakkanut piviusorsioortuunngitsunut piginnaatitsissappata, taava innuttaasut aammattaaq inuuniarnermi atukkamik pitsaannginnerulernissaat piareersimaffigisariaqarpaat. Kiffartuussineq pitsaannginnerulissaaq, tamatumani kikkut eqqugaassappat? Inuiaqatigiinni sanngiitsortaasut akisoorujussuarmik akiliisussanngussapput.

EU

ATASSUT-ip Kalaallit Nunaat nukittoq ingerlaqqinnissaminullu sapinngitsoq kissaatigaa – kultureqarnikkut aningaasaqarnikkullu. Tamanna ATASSUT-ip isumaa naaportorlugu aatsaat pisinnaavoq Kalaallit Nunaat avissaanngippat.

Pingaartuusoraarput avammut tunisassiatta sumi tuninissaannik aalajangiiniarfiusuni peqataassanissarput aammalu Kalaallit Nunaata pingaartitaanut sunniuteqarsinnaasunik

aalajangiiniarfiusuni peqataanissarput. Taamaattumik ATASSUT-ip politikkini aalajangiusimavaa aammalu Kalaallit Nunaata EU-mut ilaasortanngornissaa isumaqataaffigalugu.

Danmarkimik naalagaaffeqateqarnitsigut pissusissamisoorluinnarpoq naalagaaffittut Danmarkimisut niuernermut aningaasarsiornermullu tunngasuni isumaqataassagutta. Isumaqarpugut EU-mi ilaasortanneq assorsuaq Kalaallit Nunaannut iluaqutaassasoq, minnerunngitsumik inuussutissarsiuteqartunut aammalu suliffissanik nutaanik pilersitsinissamut.

Nunat tamarmik imminnut isumalluutiginerisa annertusiartuinnarnerat pissutigalugu Kalaallit Nunaata – kisimiilerani avissaannginnissaa pingaartuuvoq. Nunarsuarmioqatit tatisinerat illuatungilerniassagaanni suleqatissamut nukittuumut ilanngunnissarput pingaartuuvoq, ilaatigut aalisakkanik avammut tunisassiatta nunarsuarmi niuerfennut ajornannginnerusumik anngussinnaaneranik oqilisaassimut.

Niuernikkut pitsaaqutaasinnaasutut ilimanaatillit saniatigut Kalaallit Nunaat aningaasaqarnermigut EU-p assigiinngitsunik aningaasaliinissaanut periarfissarititaanik assorsuaq iluaquteqalissaaq. Inuiaqatigiinni aaqqissuussaannerup piorsarneranut ikiuutit – ilaatigut mittarfinnut, tassaavoq EU-p tapiissuteqarfigisartagaanut assersuutissaqqissut ilaat. Aammattaaq EU-p ilinniartitaanernut inunnillu isumagininnermut tapiissutitut aaqqissuussineri iluaqutigilissavavut, taamatullu nukissaqarniarnermi sivisuumik atuuttussami aningaasaliissutit amerlaqisut, soorlu erngup nukissiuuteqarnermi tapiiffigineqarnissaaq anguneqarsinnaasoq.

EU-miit aninerput inuiaqatigiinnut akisusimavoq. Ilaatigut pissutigalugu EU-p aaqqissuussinernut aningaasaateqarfiinut ineriartorfioqisunut ingerlasinnaannginnatta. Inuiaqatigiinni aaqqissuussinerit nammineerluta akilertariaqarsimavavut, tamatumalu nunanit allanit amerlaqisunik taarsigassarsiniartariaqarnerput kinguneralugu. Tamanna pissutaavoq ullumikkut aningaasat ulluinnarni naammattusaarniarnissaat ajornartorsiutiginerulersimagatsigu. Siunissami sanaartugassanut annertuunut aamma nunanit allanit taarsigassarsiniarnitsigut aningaasaliiffigissagutsigik meeqqavut – siunissami innuttaaqataasussat – akiligassanik artukkerujussuassavavut. Tamanna ATASSUT-ip peqataaffigissallugu kissaatiginngilaa.

Suliassaqarfiit pingaarutillit naliliiffigineqartussat ilaat tassaavoq nunat nutaamik ilaasortanngortut aalisarnikkut isumaqatigiissuterput iluatinnaatilerujussuaq qanoq isumaqarfigineraat. Aammattaaq EU-mik siunissaaq tamaat naqisimaneqanngitsumik niueqateqarnissarput ingerlatiinnassaneripput nalilivigineqassaaq. Siunissami aalajangiisuulluinnartussaavoq EU-mi naalagaaffiit aalisartoqarfiusut nutaat aalisarnikkut niuernikkullu isumaqatigiissutinut taama iluatinnaateqartigisunut peqataajumassanersut.

Misissueqqissaartariaqarpugut ilaasortanngornitsigut suut iluaqutigisinnaanerivut. Apeqqutit tamakkua tamarmik innuttaasut ilaasortanngorsinnaanermut qanoq isummernissaannut aalajangiisuussapput.

Naak pilersaarut ”issittumi igalaaq” pillugu pitsaasunik suliniuteqartoqaraluartoq ATASSUT isumaqarpoq EU-mut tunngassutillit peqqissaartumik misissorneqartariaqartut. ATASSUT-ip kalerrisaarutit EU-p ministeriisa Kalaallit Nunaannut tikeraarnermik nalaanni nassiussaatakuai. EU-mi nunat ilaasortaasut amerliartuinnartut aalisarnikkut isumaqatigiissummi killiliussat naammagittaalliuutigaat. Ilaatigut pissutigalugu EU-p aningaasat aalisarnermik

isumaqatigiissummut attuumassuteqartut ikililermagit tamatumalu peqatigisaanik ineriartortitsinnermut tapiissuteqartarluni.

Kalaallit Nunaata ilaasortanngorsinnaanermi EU-p aningaasaliissuteqarnissamut periarfissaanik assigiinngitsunik annertuumik iluaquteqarsinnaanera ATASSUT-ip misissorumavaa. ATASSUT-ip ilaasortaaneq aningaasaqarnikkut inuiaqatigiit aqqissuussaanerata piorsarnissaanut iluaqutaasinnaanera misissorumavaa. Ilaatigut mittarfiit, tassaapput EU-p tapiissuteqarfigisartagaanut assersuutissaq qissut ilaat. Aammattaaq ATASSUT-ip misissorumavaa, Kalaallit Nunaata EU-p ilinniartitaanernut innuillu isumaginninnermut tapiissutitut aqqissuussineri iluaqutigisinnaanera, taamatullu nukissaqarniarnermi sivisuumik atuuttussami aningaasaliissutit amerlaqisut, soorlu erngup nukissiuuteqarnermi tapiiffigineqarnissaq anguneqarsinnaanersut.

Taamaattumik ATASSUT-ip EU-mut tunngassuteqartut peqqissaartumik misissorniarpai, pisariaqassappallu ATASSUT ilaasortanngornissaq pillugu innunik taasisitsisinnaanissamut piareersimavoq. Peqqissaartumik misissuisariaqarpugut, pitsaaqutit pitsaanngequtillu Kalaallit Nunaata ilaasortanngornermigut pisinnaagai. Apeqqutit tamakkua tamarmik innuttaasut ilaasortanngorsinnaanermut qanoq isummernissaannut aalajangiisuussapput.

Nunanut tamalaanut tunngasut – Kalaallit Nunaata nunarsuarmioqatitsinnut attaveqarnera

Teknologiikkut aningaasaqarnikkullu ineriartornerup nunarsuarmi nunat imminnut pinngitsoorsinnaajunnaarsippai.

Kalaallit Nunaat tamatumani mininneqanngilaq. Inuiaqatigiinni inuussagutta taamaattumik naalagaaffiit allat ataqqillugit paasillugillu ammasumik suleqatigisariaqarpavut.

ATASSUT-ip nunat avannarliit akornanni suleqatigiinnerup patajaallisarneqarnissaa sulissutigaa, pingaartumik nunani avannarlerni killerni suleqatigiinneq.

Inuinnaat oqartussaaqataaneranni ineriartornerannilu kiisalu nunani avannarlerni inuunermi pingaartitani anguniakkanilu suleqatigiinneq taamaattoq Kalaallit Nunaannut pingaarutilerujussuuvoq pingaartumik pissutigalugu Nordisk Rådimi namminersortumik sinniisuutitaqaratta.

Nunat avannarliit killiit ataatsimoorlutik aalisarnikkut soqutigisaanni aammalu oqaluttuarisaanikkut ataatsimoorutaanni, pingaartumik Savalimmiut Kalaallit Nunaatalu akornanni, aammattaaq pissusissamisuuinnarpoq suleqatigiinnikkut nunat taakkua inuussutissarsiutaata pingaarnerusup, aalisarnerup, pitsaanerpaamik ineriartorfiunissaa angussallugu.

ATASSUT-ip naammagisimaarppaa Kalaallit Nunaat Danmarkip Europami illersoqatigiinni NATO-ni ilaasortaaneq aqutugalugu avataaniit saassunneqarnissaminut illersugaammat. Taamaattumik pissusissamisoorsoraarput USA-p Pituffimmi mittarfik NATO-mi illersornissap ilaatut piginnassappagu.

ATASSUT-ip naammagisimaarppaa Danmarkip Kalaallit Nunaat Danmarkip FN-imi aallartitaanni inissanik marlunnik tunimmagu, taamaalilluni Kalaallit Nunaat nunarsuarmioqatitsinnut isummaminik saqqummiussisnaangorlugu, pingaartumik nunap inoqqaavinut tunngatillugu.

ATASSUT-ip sapinngisamik naggueqatigiit Inuit najugaqarfiisa ataasiakkaat akornanni annertuumik suleqatigiinnissaq sulissutigaa. Taamaattumik ICC-p iluani suliap annertusarneqarnissaa patajaallisarneqarnissaalu piumagaluarpavut, pingaartumik avatangiisinut aammalu oqaatsitigut kulturimut tunngasutigut.

Kalaallit Nunaat nerrivimmi isumaqatigiinniartarfimmi timitalimmik suleqataasariaqarpoq, apeqqutit Kalaallit Nunaannut tunngassuteqartut pineqartillugit. ATASSUT-ip ministeriuneq ammasumik aammalu kinaassusersiuinngitsumik oqariartuutaa naammagisimaarpaa, tassalu Kalaallit Nunaat nammineerluni nunanik allanik toqqaannartumik isumaqatiginninniarnissaminut annertunerusumik periarfissinneqartariaqartoq. ATASSUT-ip tamanna kaammattuutitut tiguaa aammalu Kalaallit Nunaata sapinngisamik annertunerpaamik nunanik allanik isumaqatigiissuteqartarnermigut iluaquteqarnissaanut suut tamaasa sakkugalugit iliuuseqarniarluni.

Nunani tamalaani suliassat annertoqaat ATASSUT-ip sulissutigissallugit piareersimaffigisai. ATASSUT-ip nunani tamalaani inuiaqatigiinnik isumaqatigiissuteqartarnerit iluatinnaatillit sulissutiginiarpai. Tamatumunnga atatillugu Kalaallit Nunaata taassumalu immikkoorutaasa nunarsuarmioqatitsinnut paasisitsiniaassutigineqarneri annertuut ipput.

Peqqinnissamut politikki

Ilaqtariinnut politikki

Tunngaviusumik isummat